


周
易
義
叢

周易義叢卷之七

周易下經



艮下
兌上 咸

序卦有天地然後有萬物有萬物然後有男女有男女
然後有夫婦有夫婦然後有父子有父子然後有君臣
有君臣然後有上下有上下然後禮義有所錯天地萬
物之本夫婦人倫之始所以上經首乾坤下經首咸繼
以恒也天地二物故二卦分爲天地之道男女交合而
成夫婦故咸與恒皆一體合爲夫婦之義咸感也以說
爲主恒常也以正爲本而說之道自有正也正之道固

有說焉巽而動剛柔皆應說也咸之爲卦兌上艮下少女少男也男女相感之深莫如少者故二少爲咸也艮體篤實止爲誠懇之義男志篤實以下交女心說而上應男感之先也男先以誠感則女說而應也

程傳

咸亨利貞取女吉

咸交感也兌柔在上艮剛在下而交相感應又艮止則感之專兌說則應之至又艮以少男下於兌之少女男先於女得男女之正婚姻之時故其卦爲咸其占亨而利貞取女則吉蓋咸有必通之理然不以貞則失其亨而所爲皆凶矣

本義

○咸感也此卦明人倫之始夫婦

之義必須男女共相感應方成夫婦既相感應乃得亨
通若以邪道相通則凶害斯及故利在貞既感通以正
即是婚媾之善故曰咸亨利貞取女吉也

孔穎達

○京

氏傳曰咸從否來本乾坤之變也乾之上九下爲九三
坤之六三上爲上六以卦氣言之否七月辟卦咸五月
公卦以姤爲辟正男遇女之時也故乾坤交感而夫婦
之象成

郎顗

○上經首乾坤而終坎離父母雖異體而

精氣則相易以爲用天地絪縕萬物化醇男女構精萬
物化生故曰乾坤者易之門戶也下經首咸恒而終既
未濟夫婦雖合體然精氣相交則濟其用不相交則未

濟其用故天地交則爲泰不交則爲否咸自否來乾先
交於坤故取男下女之義爲咸言感者交之始也恒自
泰來乾坤已交故取夫婦居室之義爲恒言恒者交之
常也

荀九家

○咸感也不曰感者咸有皆義男女交相

感也物之相感莫如男女而少復甚焉凡君臣上下以
至萬物皆有相感之道物之相感則有亨通之理君臣
能相感則君臣之道通上下能相感則上下之志通以
至父子夫婦親戚朋友皆情意相感則和順而亨通事
物皆然故咸有亨之理也利貞相感之道利在於正也
不以正則入於惡矣如夫婦之以媾姤君臣之以媚說

上下之以邪僻皆相感之不以正也取女吉以卦才言也卦有柔上剛下一氣感應相與止而說男下女之義以此義取女則得正而吉也

伊川

○易无思无爲感而

遂通天下之故有心於求感非易之道故去心而名卦

以咸

李季辨

○咸皆也无心之感也无心於感者无所

不感也感則必通而利在於貞此言感之道當如此取女吉專言取女者當如此女以貞靜爲正男不下女而女從之非貞女也不可取矣

胡炳文

測曰程傳天地萬物之本故上經首乾坤夫婦人倫之始故下經首咸繼以恒也咸卦本自否變乾下與

坤交變而爲艮坤上與乾交變而爲兌咸之柔上而剛下是地氣上躋而天道下降也二氣感應以相與山澤通氣也而應復爲感感復爲應是爲交相感應也又艮止於下則感之專兌說於上則應之至是爲止而悅乾本在上而先下索於坤又少男在少女之下是爲男下女和之至也故其卦爲感感感也天下之道莫有大於感者自君臣上下以至父子夫婦親戚朋友皆具相感之道卦辭必以男女爲况者蓋男女之交感即天地之交感也雖人道之常而至道存焉記所謂夫婦之愚不肖皆可以與知能是已聖

人之意若謂使天下感應之道果皆如少男少女之
交感專且悅焉則有必亨之理觀天地感而萬物化
生則可見矣然必利於貞亦如男女之得其正婚姻
之得其時斯爲不失感通之道焉耳天地无心而成
化亦不過貞而已矣又取女而得此占則吉凡以其
得正與時故也其占曰亨利貞而不言元者何也蓋
感即元也程淳公曰天地萬物之理无獨必有對又
曰天地之間只有一箇感與應而已更有甚事由是
言之感應者即天地萬物之對也无感應則无以見
易矣

象曰咸感也

釋卦名義

本義

○卦之二體陽感而陰應陰感而陽應

六畫皆相與卦之所以得咸感之名也

吳切清

柔上而剛下二氣感應以相與止而說男下女是以亨利貞取女吉也

以卦體卦德卦象釋卦辭或以卦變言柔上剛下之義

曰咸自旅來柔上居六剛下居五也亦通

本義

○二氣

感應以相與是以亨也止而說故利貞也男下女故取

女吉也

王輔嗣

○艮剛而兌柔若剛自在上柔自在下

則不相交感无由得通今兌柔在上而艮剛在下是二

氣感應以相授與所以爲咸亨也艮止而兌說能自靜止則不隨欲動以止行說則不爲邪諂不失其正所以利貞艮爲少男而居於下兌爲少女而處於上是男下於女也婚姻之義男先於女親迎之禮御輪三周皆是男先下於女然後女應於男所以取女得吉也

孔穎達

○咸之義感也在卦則柔爻上而剛爻下柔上變剛而成兌剛下變柔而成艮陰陽相交爲男女交感之義又兌女在上艮男居下亦柔上剛下也陰陽二氣相感相應而和合是相與也止而說止於說爲堅慤之意艮止於下篤誠相下也兌說於上和說相應也以男下女和

之至也。相感之道如此。是以能亨通而得正。取女如是則吉也。卦才如此。大率感道利於正也。伊川○柔上上也。六本居三。上與乾交而爲兌也。剛下三也。九本居上。下與坤交而爲艮也。二氣感應以相與。釋咸亨義。止而說以二德言。人心之說動易失正。唯止而能說。則无徇情從欲之失。此釋利貞義。男下女以二象言。謂以艮之少男下於兌之少女也。凡婚姻之道。无女先男者。必女貞靜。男先下之。則爲得男女之正。此釋取女吉義。丘衍

可○剛柔以質言。感應以氣言。

馮奇之

天地感而萬物化生。聖人感人心而天下和平。觀其所感。

而天地萬物之情可見矣

極言感通之理

本義

○感物而動謂之情天地萬物皆

以氣類共相感應故觀其所感而天地萬物之情可見

矣

孔穎達

○情者其誠然也雲龍風虎无故相從者豈

容僞哉

東坡

○天地感而萬物化生言乾坤交而大化

行也聖人感人心而天下和平言二五交而治化行也

胡旦

○既言男女相感之義復推極感道以盡天地之

理聖人之用天地二氣交感而化生萬物聖人至誠以
感億兆之心而天下和平天下之心所以和平由聖人
感之也觀天地交感化生萬物之理與聖人感人心致

和平之道則天地萬物之情可見矣感通之理知道者

默而觀之可也

伊川

象曰山上有澤咸君子以虛受人

山上有澤以虛而通也

本義

○以虛受人物乃感應

王

輔嗣

○山高而降澤下而升山澤通氣感之象也

崔憬

○澤性潤下土性受潤澤在山上而其漸潤通徹是二物之氣相感通也君子觀山澤通氣之象而虛其中以受於人夫人中虛則能受實則不能入矣虛中者无我也中无私主则无感不通以量而容之擇合而受之非聖人有感必通之道也

伊川

○山澤通氣而後萬物化

生君子法之以虛受人惟虛故受受故能感不能感者以不能受故也不能受者以不能虛中故也郭雍○人之一心其寂然不動感而遂通者虛故也苟以私意實之則先入者爲主而感應之機窒雖有至者皆捍之而不受矣故山以虛則能受澤心以虛則能受人丘行可

測曰咸以虛受人者何曰程正公有言虛中者无我也中无私主則无感不通且山澤以其通氣也而草木生之禽獸居之寶藏興貨財殖焉然則君子之以虛受人也謂盛德大業而不由是焉吾不信也

初六咸其拇象曰咸其拇志在外也

拇足大指也咸以人身取象感於最下咸拇之象也感之尚淺欲進未能故不言吉凶此卦雖主於感然六爻皆宜靜而不宜動也

本義

○處咸之初爲感之始所感

在末故有志而已如其本實未至傷靜象云志在外者四屬外也

王輔嗣

○咸其拇者拇是足大指也體之最

末初應在四俱處卦始爲感淺未取譬一身在於足指而已志雖小動未甚躁求凡吉凶悔吝生乎動者也以其本實未傷於靜故无吉凶悔吝之辭

孔穎達

○初在

卦下拇之象所感未深拇動而已未至失性

陸震

○初

六在下卦之下與四相感以微處初其感未深豈能動

於人故如人拇之動未足以進也拇足大指人之相感有淺深輕重之異識其時勢則所處不失其宜矣

伊川

○初與四應四以心感而初以足行不曰足而曰拇者以陰居下靜而未行蓋心感而跡未應也

呂大防

六二咸其腓凶居吉象曰雖凶居吉順不害也

腓足肚也欲行則先自動躁妄而不能固守者也二當其處又以陰柔不能固守故取其象然有中正之德能居其所故其占動凶而靜吉也

本義

○咸道轉進離拇

升腓腓體動躁者也感物以躁凶之道也由躁故凶居則吉矣處不乘剛故可以居而獲吉象云順不害者陰

而爲居順之道也不躁而居順不害也

王輔嗣

○足之

腓腸應在九五腓動而躁由躁故凶靜居則吉蓋陰性本靜今能不躁而居順其本性故未有災害也

孔穎達

○處得其位情未違中居則爲正動則爲躁居則承陽承陽爲順得正則吉是順而不害

陸德明

○腓拇之上

股之下躁動之物但居其所推誠以及人則人自感而

歸之

胡旦

○六二失女止待男之道止而待五乃得吉

不介

○二以陰在下與五爲應故設咸腓之戒腓足肚

行則先動足乃舉之非如腓之自動也二若不守道待上之求而如腓之動則躁妄自失所以凶也安其居而

不動以待上之求則得進退之道而吉也二中正之人
以其在咸而應五故爲此戒復云居吉若安其分不自
動則吉也

伊川

○鍾不扣而鳴則妖石非言之物而言

則怪物有不感而自動者乎故以居爲吉

楊萬里

九三咸其股執其隨往吝象曰咸其股亦不處也志在隨
人所執下也

股隨足而動不能自專者也執者主當持守之意下二
爻皆欲動者三亦不能自守而隨之往則吝矣故其象
占如此象言亦者因前二爻皆欲動而云也二爻陰躁
其動也宜九三陽剛居止之極宜靜而動可吝之甚也

本義

○股之爲物隨足者也進不能制動退不能靜處

所感在股志在隨人者也志在隨人所執亦以賤矣用

斯以往吝亦宜也

王輔嗣

○剛而得位雖欲感上以居

艮極止而不前二隨於已志在於隨下執二也若遂隨

二以感五則失止義而往吝窮也

崔憬

○居下體之上

上體之下上不能安其身下不能自守隨於上下者也

上不能安其身亦不處上下不能制其足志在隨人執

其隨僕厮之志也

劉牧

○三與上各處卦極是感道已

終感之後時者也不能感上上動而求感故曰咸其股已失其感又務求之下比二陰陰又以失其感動而相

求乃隨六二以進故曰執其隨

石介

○九三以陽居剛

有剛陽之才而爲主於內居下之上是宜自得於正道以感於物而乃應於上六陽好上而說陰上居感說之極故三感而從之股者在身之下足之上不能自由隨身而動者也故以爲象言九三不能自主隨物而動如股然其所執守者隨於物也剛陽之才感於所說而隨之如此而往可羞吝也

伊川

○腓居下體之中二象股

居下體之上三象程子謂三隨上蔡氏謂三動而二隨之朱子本義以爲股隨足而動象三隨二與初而動艮言隨在二二腓隨三之限而止也咸言隨在三三股隨

下之足而動也。

胡炳文

九四貞吉悔亡憧憧往來朋從爾思象曰貞吉悔亡未感害也憧憧往來未光大也

九四居股之上脢之下又當三陽之中心之象咸之主也心之感物當正而固乃得其理今九四乃以陽居陰爲失其正而不能固故因占設戒以爲能正而固則吉而悔亡若憧憧往來不能正固而累於私感則但其朋類從之不復能及遠矣象云感害言不正而感則有害也

本義

○處上卦之初應下卦之始居體之中在股之

上二體始相交感以通其志心神始感者也凡物始感

而不以之於正則至於害故必貞然後乃吉吉然後乃得亡其悔也始在於感未盡感極不能至於无思以得其黨故有憧憧往來然後朋從爾之所思也

王輔嗣

○

失位悔也應初動得正憧憧懷思慮也欲感上隔五欲感初隔三故憧憧往來之內爲來之外爲往兌爲朋少女也四之變則上體爲坎坎心爲思故曰朋從爾思

虞

仲翔

○咸本從否來外卦乾體九四爲震心志之象內

卦爲坤應初爲巽氣體之象九四若守其乾剛之正則吉而悔亡若以居陰而應於巽則憧憧往來而爲感所害矣故朋從其思而未光大也

蜀才

○不能感天下惟

已之朋類往而歸之

胡翼之

○卦體上下感應獨去其

心象辭君子以虛受人九四不言咸其心子曰天下何

思何慮再言之所以戒偏感之深也

劉牧

○九四失位

懼失其初疑初之不來思慮憧憧往來不定然後初六

從之以陽居陰未至於亢故吉雖无感害而憧憧往來

以役思慮何光大之有

石介

○感者人之動也故皆就

人身取象拇取在下而動之微腓取先動股取其隨九

四无所取直言感之道不言咸其心感乃心也四在中

而居上當心之位故爲感之主而言感之道貞正則吉

而悔亡感不以正則有悔也又四說體居陰而應初故

戒於貞感之道无所不通有所私係則害於感通乃有
悔也聖人感天下之心如寒暑雨暘无所不通无不應者
亦貞而已矣貞者虛中无我之謂也憧憧往來朋從爾
思夫貞一則所感无所不通若往來憧憧然用其私心以
感物則思之所及者有能感而動所不及者不能感也
是其朋類則從其思也以有係之私心既主於一隅一
事豈能廓然无所不通乎

伊川

○憧憧動心之貌貞則

靜靜則虛虛則一一則於來也无迎於往也无將既應
之後猶未應之初也靜亦定動亦定寂也未嘗不感感
也未嘗不寂何憧憧之有

齊覺翁

九五咸其脢无悔象曰咸其脢志末也

脢背肉在心上而相背不能感物而无私係九五適當

其處故取其象而戒占者以能如是則雖不能感物而

亦可以无悔也象云志末謂不能感物

本義

○脢者心

之上口之下進不能大感退亦不爲无志其志淺末故

无悔而已

王輔嗣

○脢諸說不同輔嗣以四爲心神上

爲輔頰五在上四之間故直云心之上口之下明其淺

於心神厚於言語

孔穎達

○在脊曰脢心脊之肉感近

於情而非其志

子夏傳

○背肉頑然不動可謂淺末以

其居中得正方乃无悔

陸震

○位尊志驕不下於二失

其二也有感之時无感之道所失大所得小僅能居位

无悔而已

石介

○晦背脊肉也背其私心比於上六卦

以初爲本上爲末

朱震

○九居尊位當以至誠感天下

而應二比上若係二而悅上則爲偏私淺狹非人君之道豈能感天下乎晦背肉也與心相背而所不見也言能背其私心感非其所見而悅者則得人君感天下之正而无悔也象復戒使背其心而咸晦者爲其存心淺末繫二而悅上感於私欲也

伊川

上六咸其輔頰舌象曰咸其輔頰舌滕口說也

輔頰舌皆所以言者而在身之上上六以陰居說之終

處咸之極感人以言而无其實又兌爲口舌故其象如此凶咎可知象云滕騰通用本義○咸道轉末故在口

舌言語而已憧憧往來猶未光大况在滕口薄可知已

王輔嗣

○馬融云輔上領也鄭康成云滕當作騰送也

正義

○咸道貴速三與上各居亢極不能相感失所感

之道皆動而求感股與輔頰舌皆非心也

石介

○上陰

柔而說體爲說之主又居感之極是其欲感物之極也

故不能以至誠感物而發見於口舌之間小人女子之

常態也豈能動於人乎不直云口而云頰輔舌亦猶今

人謂口過曰唇吻曰頰舌也輔頰舌皆所以言也

伊


川○初與四應故拇與心皆在前二與五應故腓與脢
皆在後三與上應故股與頰輔舌皆在兩旁而舌居中
有至理存焉

程直方

測曰卦以彼此相感爲義故卦辭以夫婦取象爻以
彼感於我爲義故爻辭以吾身取象凡陰皆屬氣凡
陽皆屬志咸其拇物初感而氣方動然動而未形有
无之間故以咸其拇爲象感之尚淺其進止猶未必
也物未感而志在中氣纔動則志在外故傳曰志在
外也六二咸其腓氣動之極然居中得正志爲之主
故戒其動則凶而居則吉也居者志能帥氣也苟志

能帥氣則動靜必順於理居則爲中動則爲和故傳
曰順不害也九三陽剛志之象然由坤之六三而變
爲剛又比於下之二陰是德不勝其氣性命於氣者
也故曰執其隨而傳曰亦不處也氣壹則動志也往
則吝矣從其小體爲小人故傳曰所執下也九四心
之象而獨不曰咸其心者蓋聖人之常以其情順萬
事而无情故也曰貞者貞固足以幹事故爲咸之主
而繫辭傳復以天地聖人之感應爲言蓋欲爲天下
立極也若曰必如是則吉而悔亡云爾憧憧者志爲
氣所動也朋者初也與四爲往來之交故戒之曰若

憧憧往來則惟朋從爾思而已朋與尚書孺子其朋之朋同此小人之感通也知誘物化者天下皆是也豈足以當九四之義而爲咸之主哉九五之咸其脢與告子之不動心大畧相似是釋氏之流也故僅可以免悔而已傳曰志末也不能感物志亦末矣上六以陰柔之質在身之上當吾悅意之終加以欲感人之極故遂感人以言而過其實信不近於義其言果可復乎傳曰滕口說也其无實可知矣



巽下
震上 恒

序卦夫婦之道不可以不久也故受之以恒恒久也咸

夫婦之道夫婦終身不變者也故咸之後受之以恒也
咸少男在少女之下以男下女是男女交感之義恒長
男在長女之上男尊女卑夫婦居室之常道也論交感
之情則少爲親切論尊卑之序則長當謹正故兌艮爲
咸而震巽爲恒也男在女上男動乎外女順乎內人理
之常故爲恒也又剛上柔下雷風相與巽而動剛柔相
應皆恒之義也

程傳

恒亨无咎利貞利有攸往

恒常久也爲卦震剛在上巽柔在下震雷巽風二物相
與巽順震動爲巽而動二體六爻陰陽相應四者皆理

之常故爲恒其占爲能久於其道則亨而无咎然又必
利於守貞則乃爲得所常久之道而利有所往也

本義

○恒而亨以濟三事也恒之爲道亨乃无咎也恒通无
咎乃利正也各得所恒修其常道終則有始往而无遠
故利有攸往也三事者一亨也二无咎也三利貞也是
謂各得所恒

王輔嗣

○恒久之道所貴變通恒通无咎

然後利以行正得其恒道何往不利

孔穎達

○京氏傳

曰恒自泰來以卦氣言之泰正月辟卦恒七月卿卦當
利物和義之時可常之道也

即顓

○女承陽爲恒久之

道如風雷不相悖是以亨而无咎二五易位而和且得

中故利有攸往

陸希聲

○咸少女在上少男在下取一

時相感之義恒則長男在上長女在下孫先生曰咸男

先下女以成家既成其家不可不正也君先下臣以成

國既成其國不可不治也男動乎外女順乎內君動於

上臣順於下家國之常不可易也易則生亂故曰君子

以立不易方

石介

○恒之爲道惟通且无咎而利正則

久而不變君子之學久而不已可至於聖賢大君爲治

久而不變可施仁義禮樂以化成天下何往而不利哉

胡翼之

○諸卦以有應爲吉此六爻皆應而无元吉者

夫吉於應者相求以濟之時也常者上下各得其所之

時故雖剛柔相應而不獲爲吉也

代淵

○恒者常久也

恒之道可以亨通恒而能通乃无咎也恒而不可以亨
非可恒之道也爲有咎矣如君子之恒於善可恒之道
也小人恒於惡失可恒之道也恒所以能亨由貞正也
故云利貞夫所謂恒謂可恒久之道非守一隅而不知
變也故利於有往唯其有往故能恒也一定則不能常
矣又常久之道何往不利

伊川

○聞之師曰恒有二義

有不易之恒有不已之恒利貞者不易之恒也利有攸
往者不已之恒也合而言之乃常道也倚於一偏則非
道矣

徐幾

○乾坤氣化之始故曰元亨利貞咸恒形化

之始故曰亨而不言元然咸亨不以正則徒爲人欲之
感恒亨不以正亦非天理之常也故皆以利貞戒之

胡

炳文

測曰程子有言咸恒體用也愚繹其說曰天尊地卑
而禮制行體也於恒見焉流而不息合同而化用也
於咸見焉恒之爲卦震上巽下以卦變言之恒自泰
來乾索坤居四爲震是剛上也坤之柔來居乾下爲
巽是柔下也天尊地卑常也雷風相與者陽倡而陰
和亦常也順而動三才之常理也剛柔皆應又感應
之常理也故其卦名爲恒恒與中庸庸字同義凡道

之可常行者即天下之達道也固亨且无咎矣然又必利在於貞者又於其道也又非其道則難乎其有恒矣即中庸所謂至誠无息不息則久是已其存也則爲至正之德其發也則爲時中之用故曰利有攸往即中庸所謂久則徵博厚配地高明配天悠久无疆者是已程正公曰恒非一定之謂也一定則不能恒矣惟隨時變易乃常道也此正發明時中之義傳曰日月得天而能久照四時變化而能久成者何也曰維天之命於穆不已日月得其不已之命故能久照寒往則暑來暑往則寒來往者屈也來者伸也四

時得其變化之理故能久成易窮則變變則通通則久聖人之久於道也蓋以不已爲體以變通爲用故能行之不已而天下化成也記曰於乎不顯文王之德之純此文王之所以爲文也純亦不已然則久於其道而天下化成非文王其孰能當之其彖恒也旨深遠矣

彖曰恒久也剛上而柔下雷風相與巽而動剛柔相應恒以卦體卦象卦德釋卦名義或以卦變言剛上柔下之義曰恒自豐來剛上居二柔下居初也亦通義本○剛上而柔下剛尊而柔卑得其序也雷風相與長陽長陰能

相成也。巽而動動无違也。剛柔皆應不孤。媿也。皆可久。

之道。

王輔嗣

○恒自泰來。初九上爲九四。六四下爲初

六。地天爲泰。男下於女也。與咸同義。今變而長男居上。長女居下。男尊女卑。此夫婦居室之常道也。故爲恒。蜀

才

○恒者長久之義。卦才有此四者。成恒之義也。剛上

而柔下。謂乾之初上居於四。坤之四下居於初。剛爻上而柔爻下也。二爻易處則成震。巽震上巽下亦剛上而柔下也。剛處上而柔居下。乃恒道也。雷風相與。雷震則風發。二者相須交助其勢。故云相與。乃其常也。巽而動下巽順上震動爲以巽而動。天地造化恒久不已者順。

動而已巽而動常久之道也動而不順豈能常也剛柔
皆應一卦剛柔之爻皆相應剛柔相應理之常也此四
者恒之道也卦所以爲恒也伊川○剛上柔下乾坤交
而雷風相與矣巽而後動卦體成而剛柔皆應矣此名
卦所以有取於恒也胡一桂

恒亨无咎利貞久於其道也天地之道恒久而不已也

恒固能亨且无咎矣然必利於正乃爲久於其道不正
則久非其道矣天地之道所以長久亦以正而已矣本

義○恒之道可致亨而无過咎但所恒宜得其正失正
則非可恒之道也故曰久於其道天地之所以不已蓋

有恒久之道人能恒於可恒之道則合天地之理也

川

利有攸往終則有始也

久於其道終也利有攸往始也動靜相生循環之理然

必靜爲主也

本義

○天下之理未有不動而能恒者也

動則終而始復所以恒而不窮凡天地所生之物雖山
嶽之堅厚未有能不變者也故恒非一定之謂也一定
則不能恒矣唯隨時變易乃常道也故云利有攸往明
理之如是懼人之泥於常也

伊川

日月得天而能久照四時變化而能久成聖人久於其道

而天下化成觀其所恒而天地萬物之情可見矣

極言恒久之道

本義

○久於其道者道德所久則常通

无咎而利正也天地之道得其所久故不已也終則有始者得其常道故終則復始往无窮也日月四時各得其所恒故皆能長人觀其所恒而天地萬物之情可見矣總結恒義也

王輔嗣

○此極言常理日月陰陽之精

氣耳唯其順天之道往來盈縮故能久照而不已得天順天理也四時陰陽之氣耳往來變化生成萬物亦以得天故常久不已聖人以常久之道行之有常而天下化之以成美俗也觀其所恒謂觀日月之久照四時之

久成聖人之道所以能常久之理觀此則天地萬物之情理可見矣天地常久之道天下常久之理非知道者孰能識之。伊川○彖言所以爲恒者四剛上而柔下雷風相與巽而動剛柔相應是也又言恒之所以爲道者二久於其道也終則有始也久於其道雖天地亦如之終則有始雖日月四時亦如之此所以見天地萬物之情也。郭雍

象曰雷風恒君子以立不易方

君子觀雷風相與成恒之象以常久其德自立於大中之常久之道不變易其常所也。程傳○長陽長陰合而相

與可久之道也君子立身得其恒久之道故不易改其

方方猶道也孔穎達○立人之道曰仁與義不改仁義

之道劉牧○雷資風而益遠風假雷而增威君子當觀

大舜之烈風雷雨弗迷以立不易方也褚仲都○雷以

震動其出有時風以撓散其發有道出發不恒威令何

稟薛溫其○雷風雖變而有不變者存體雷風之變者

爲我之不變者善體雷風者也胡炳文

測曰法象以立不易方者何高陵呂氏曰既動而順

又易方焉則渝常道也不易方者非泥也君子懼誘

于物也

初六浚恒貞凶无攸利象曰浚恒之凶始求深也

初與四爲正應理之常也然初居下而在初未可以深有所求四震體而陽性上而不下又爲二三所隔應初之意異乎常矣初之柔暗不能度勢又以陰居巽下爲巽之主其性務入故深以常理求之浚恒之象也占者如此則雖貞亦凶而无所利矣

本義

○處恒之初最處

卦底始求深者也求深窮底令物无餘蘊漸以至此物猶不堪而况始求深者乎以此爲恒凶正害德无施而利也

王輔嗣

○常之爲義貴久於其道日以浸深初爲

常始宜以漸爲常而體巽性躁遽求深入是失久於其

道之義不可以爲常故正凶

陸秉

○猶爲學之始欲亟

至周孔爲道之始欲遽及堯舜爲朋友之始欲契分之
深爲君臣之始欲道之行孔子所謂欲速不達

胡翼之

○巽入也以柔越二剛而深入於四入不以漸而求深
於始以是爲常物不能堪雖正亦凶

王介甫

○初居下

而四爲正應柔暗之人能守常而不能度勢四震體而
陽性以剛居高志上而不下又爲二三所隔應初之志
異乎常矣而初乃求望之深是知常而不知變也浚深
之也浚恒惟求恒之深也守常而不度勢求望於上之
深堅固守此凶之道也泥常如此无所往而利矣世之

責望故素而致悔咎者皆浚恒者也志既上求之深是不能恒安其處者也柔微而不恒安其處亦致凶之道凡卦之初終淺與深微與盛之地也在下而求深亦不知時矣

伊川

○初居巽下以深入爲恒上居震極以震

動爲恒在始而求深在上而好動皆凶道也初如未信而諫未信而勞其民之類上如秦王漢武之類是也

震

九二悔亡象曰九二悔亡能久中也

以陽居陰本當有悔以其久中故得亡也

本義

○雖失

其位恒位於中可以消悔

王輔嗣

○恒久之道須君在

臣上男在女上剛在柔上九二九三剛爻在下失恒道

也孫先生云二以陽居陰上應於五履非其位不正其

室但能居中自守雖得悔亡何足尚哉石介○以陽繫

陰用以爲常不能无悔以其爻中故免橫渠○動而无

悔爻處而不厭者其惟中乎朱震○在恒之義居得其

正則常道也九陽爻居陰位非常理也處非其常本當

有悔而九二以中德而應於五五復居中以中而應中

其處與動皆得中也是能恒久於中也能恒久於中則

不失正矣中重於正中則正矣正不必中也九二以剛

中之德而應於中德之勝也足以亡其悔矣人能識重

輕之勢則可以言易矣

伊川

九三不恒其德或承之羞貞吝象曰不恒其德无所容也
位雖得正然過剛不中志從於上不能久於其所故爲
不恒其德或承之羞之象或者不知其何人之辭承奉
也言人皆得奉而進之不知其所自來也貞吝者正而
不恒爲可羞吝申戒占者之辭

本義

○處三陽之中居

下體之上處上體之下上不全尊下不全卑中不在體
體在於恒而分无所定无恒者也德行无恒自相遲錯
不可致詰故或承之羞也處久如斯物莫之納鄙賤甚
矣故曰貞吝也

王輔嗣

○恒以陽居陰上爲德今九三

反居上六之下是失常德况乎履不得中宜其羞辱隨

之不爲時之所容孫復○剛而失中曰損其德若固所

守則吝矣劉牧○九三居上六柔弱之下於永久貞正

之道誠足鄙吝胡旦○重剛而不中剛之過也巽而順

乎柔巽之過也不怛如此承之者其至柔一而羞矣雖

貞而吝況不貞乎豈惟下所恥承亦上之所不與故无

所容夫可以爲常者莫如中故九二失位而能悔亡九

三得位而无所容以中爲常則出處語默其趣无方而

不害其常王介甫○艮兌合而爲咸震巽合而爲恒故

卦莫吉於咸恒者以其合也及離而觀之見已而不見

彼則所以爲咸恒者亡矣故咸恒无定爻其美者不過
悔亡恒之世惟四宜下初自初以上皆以陰下陽上爲
正故九二九三六五上六皆非正也以中者用之可以
悔亡以不中者用之无常之人也故九三不恒其德

東坡

○三陽爻居陽位處得其位是其常處也乃志從於
上六不惟陰陽相應風復從雷於恒處而不處不恒之
人其德不恒則羞辱或承之矣或承之謂有時而至也
貞吝固守不恒以爲恒豈不可羞吝乎象云无所容者
人既无恒何所容處當處之地既不能恒處非其據豈
能恒哉是不恒之人无所容處其身也

伊川

○九三剛

已過中而巽爲不果進退无常不恒其德者也郭忠孝

九四田无禽象曰义非其位安得禽也

以陽居陰义非其位故爲此象占者田无所獲而凡事

亦不得其所求也本義○恒於非位雖勞无獲也王輔

嗣○田者田獵以譬有事也田獵不獲以喻有事无功

也孔穎達○四體震主動又處非其位初爲已應含應

與三故田无禽陸震○四處非其位而應初之始求大

深皆失聖人义於其道之義安得禽乎石介○以陽居

陰不正也位又不中不中不正而居大臣之位是无德

而忝位者故爲治則教化不能行撫民則膏澤不能下

胡翼之

○以陽居陰處非其位處非其所雖常何益人

之所爲得其道則久而成功不得其道則雖久何益故以田爲喻言九之居四雖使恒久如田獵而无禽獸之獲謂徒用力而无功也

伊川

○四爲震體而處位不中

好變者也以好變之心應浚恒之初必不能相有也故

曰田无禽

蔡淵

○師之六五曰田有禽五柔中而所應

者剛剛實故曰有禽恒之四以剛居不中而所應者柔

柔虛故曰无禽

胡炳文

六五恒其德貞婦人吉夫子凶象曰婦人貞吉從一而終也夫子制義從婦凶也

以柔中而應剛中常又不易正而固矣然乃婦人之道

非夫子之宜也故其象占如此

本義

○居得尊位爲恒

之主不能制義而係應在二用心專貞從唱而已婦人

之吉夫子之凶也

王輔嗣

○六五係應在二不能傍及

他人是恒常貞一其德故曰恒其德貞曰婦人吉者謂

用心專貞從唱是婦人之吉也若夫子則須制斷事宜

不可專貞從唱故曰夫子凶五居尊位在震爲夫二處

下體在巽爲婦五係於二故曰從婦凶也

孔穎達

○一

陽也陰之爲物當從陽而終

石介

○貞固也爲天子之

尊有四海之廣民物之繁必使仁義教化流通於天下

不可執一道守一方必也臨事制宜隨時應變則无施
不可今六五居至尊之位以柔不正私一己之應是固
執常道不能隨宜以流通於天下者也

胡旦

○五應於

二以陰柔而應陽剛居中而所應又中陰柔之正也故
恒久其德則爲貞也夫以順從爲恒者婦人之道在婦
人則爲貞故吉若丈夫而以順從於人爲恒則失其剛
陽之正乃凶也五君位而不以君道言者如六五之義
在丈夫猶凶況人君之道乎在他卦六居君位而應
剛未爲失也在恒故不可耳君道豈可以柔順爲恒也

伊川

上六振恒凶象曰振恒在上大无功也

振者動之速也上六居恒之極處震之終恒極則不常震終則過動又陰柔不能固守居上非其所安故有振恒之象而其占則凶也

本義

○夫靜爲躁君安爲動主

故安者上之所處也靜者可久之道也處卦之上居動之極以振爲恒所以凶也

王輔嗣

○凡處於上者當守

靜以制動今上六居恒之上而以振動爲恒无施而得故象云大无功也

孔穎達

○終乎動以動爲恒者也動

靜宜不失時以交相養以動爲恒而在物上其害大矣

王介甫

○六居恒之極在震之終恒極則不常震終則

動極以陰居上非其安處又陰柔不能堅固其守皆不
常之義也故爲振恒以振爲恒也振者動之速也如振
衣振書抖擻運動之意在上而其動无節以此爲恒其
凶宜矣

伊川

○恒常也一體而含二義蓋將自其不易

者而觀之則窮天地亘古今而不可變也自其不已者
觀之則寒暑晝夜而其變未嘗已也故知不易者則拘
常知不已者則厭常皆不得恒之正也初柔拘常而過
乎常故凶上柔居終三四位不正皆偏乎不已者也或
厭常或亂常故凶且吝唯二五居中幾於得恒之正者
然五位雖剛而爻柔故不能制義而凶二爻雖剛而位

柔僅能乂中无悔而皆非有得乎恒之正也語恒之正其惟彖乎

蔡淵

測曰易者時也而有卦德與爻位焉深於易者必能度德相位與時偕行此即所謂中庸時中之道可常行者也恒初六雖與九四爲正應然以位言之初居下而四處上又爲二三所隔以時言之且在卦初以德言之四震體陽性主乎上而不下初柔暗而爲巽主其性務入故深以常理求四而有浚恒之象知恒而不知變雖貞亦凶何所利乎九二上應六五以剛中爲德而以柔中爲應恒乂而不已其處也立天下

之大本其動也爲天下之達道此恒德之至善也故
其占曰悔亡或曰以九二之至善而不得爲元吉何
也曰此所以爲中庸之至德也故與咸之九四同占
又奚事以元吉云哉九三處得其位謂宜固執而不
變也然以其過剛不中又巽體其究爲躁卦而當雷
風之變志從於上不能自守故爲不恒其德之象不
恒之人无所用咎矣人亦莫不以咎承之位貞而德
不恒故曰貞吝凡四處非其位謂宜變易以從正也
而下應初六雷風相與守常不變且居陰應柔虛而
无物恒非其道故曰田无禽而傳言又非其位雖恒

何益亦如管晏之流雖得君如彼其專也行乎國政如彼其久也祇以滋其假之之術焉耳而竟何所獲乎六五君位也君德以剛爲主而以柔中下應九二之陽剛雖貞而非其美矣若唐玄宗之於李林甫宋神宗之於王安石皆夫子之凶也然則太甲成王之於伊尹周公何以不凶曰知其賢而從之即謂制義也豈從婦者所可比乎上六居恒之終謂宜如夫子所稱國有道不變塞焉國无道至死不變可也然而恒極則思變震終則過動難乎其有恒矣故爲振恒之象凶可知已記曰中庸不可能也自非義精仁熟

之君子其何以與於此哉



艮下遯
乾上遯

序卦恒者久也物不可以久居其所故受之以遯遯者退也夫久則有去相須之理也遯所以繼恒也遯退也避也去之之謂也爲卦天下有山天在上之物陽性上進山高起之物形雖高起體乃止物有上陵之象而止不進天乃上進而去之下陵而上去是相違遯故爲遯去之義二陰生於下陰長將盛陽消而退小人漸盛君子退而避之故爲遯也

程傳

遯亨小利貞

遯退避也爲卦二陰浸長陽當退避故爲遯六月之卦也陽雖當遯然九五當位而下有六二之應若猶可以有爲但二陰浸長於下則其勢不可以不遯故其占爲君子能遯則身雖退而道亨小人則利於守正不可以浸長之故而遂侵迫於陽也小謂陰柔小人也此卦之占與否之初二兩爻相類

本義

○遯者隱退逃避之名

陰長之卦小人方用君子曰消君子當此之時若不隱遯避世則受其害須遯而後得通故曰遯亨小利貞者陰道初始浸長正道亦未全滅故曰小利貞

孔穎達

○

遯遁去之象五得位而有應是用正道得禮見召聘始

仕他國當尚謙遜居小官幹小事其進以漸則遠妬忌之害陳敬仲奔齊辭卿是其義也

鄭康成

○陰方至中

消臨爲遯是以小者利貞謂六二得中正也小人雖得

中正未可以爲大事

陸績

○二陰纔長陽宜早退君子

見幾而作不俟終日

石介

○三陰進而爲否然後不利

君子貞二陰方進而未至於否猶可以小利貞也

單氏

○遯者陰長陽消君子遯藏之時也君子退藏以伸其

道道不屈則爲亨故遯所以有亨也在事亦有由遯避

而亨者雖小人道長之時君子知幾退避固善也然事

有不齊與時消息无必同也陰柔方長而未至於甚盛

君子尚有遲遲致力之道不可大貞而尚利小貞也

川○二陰浸長不利君子進則否而退則亨也

郭雍

測曰遯之爲卦當小人之道寢長之時然九五當位而有六二之應是君子在位而小人之中尚有與之相合者若猶可以有爲但以氣化與人事占之君子終不能遏彼之盛以強此之衰故其占爲遯而亨有君子能遯而去之則身雖退而道則亨即或未遯而猶在位也隨宜致力亦小利貞而已不可以大貞也屯九五象辭所謂小貞吉大貞凶是其義也求之古人惟文王之去殷紂孔子之去魯定公爲足以當之

耳是故文王之在朝也終无能改於其君之德及其去也僅能因獻地而請去炮烙之刑而已孔子之相魯也使仲由墮三都不克亦僅能數少正卯之罪誅之耳矣此所謂小利貞也小利貞與巽小亨同義遯之時義孔子親履其事故贊之曰遯之時義大矣哉彖曰遯亨遯而亨也剛當位而應與時行也

以九五爻釋亨義

本義

○遯之爲義遯乃通也剛當

位謂五也當位而應非否亢也遯不否亢能與時行也

王輔嗣

○小人道長之時君子遯退乃其道之事也若

子遯藏所以伸道也此言處遯之道自剛當位以下則

論時與卦才尚有可爲之理也五以剛陽之德處中正之位又下與六二以中正相應雖陰長之時如卦之才尚當隨時消息苟可以致其力无不至誠自盡以扶持其道未必於遜藏而不爲故曰與時行也伊川
小利貞浸而長也

以下二陰釋小利貞

本義

○陰道欲浸而長正道亦未

全滅故小利貞也

王輔嗣

○當位而應猶不果濟與時

行而已矣小貞吉大貞凶當相其機宜可也

子夏傳

○

君子晦迹潛光不使小人窺其爲剛明中正之君子下應六二之小人君子之道无固必小人能以中順之道

附結於已是君子適變能與天時俱行也

胡翼之

○五

與二應君臣之道未至否隔亢極可以相時而通

代淵

○九五陽剛當位反應六二與時之義也

蘭廷瑞

○彖

辭遯亨爲四陽言也彖傳專言九五者九五四陽之統得處遯之宜有致亨之道也小者利於貞以其浸而長以消陽也於斯時乎君子其可以不遯乎

吳切清

遯之時義大矣哉

陰方浸長處之爲難故其時義爲尤大也

本義

○歎美

遯德相時度宜避世而遯自非大人照幾不能如此其

義甚大故云大矣哉

孔穎達

○當陰長之時不可大貞

而尚小利貞者蓋陰長必以浸漸未能遽盛君子尚可
小貞其道所謂小利貞扶持使未遂亡也遯者陰之始
長君子知微故當深戒而聖人之意未便遽已也故有
與時行小利貞之教聖賢之於天下雖知道之將廢豈
肯坐視其亂而不救必區區致力於未極之間強此之
衰艱彼之進圖其暫安苟得爲之孔孟之所屑爲也王
允謝安之於漢晉是也若有可變之道可亨之理更不
假言也此處遯時之道也故聖人贊其時義大矣哉或
久或速其義皆大矣

伊川

象曰天下有山遯君子以遠小人而嚴

天體无穷山高有限遯之象也嚴者君子自守之常而

小人自不能近

本義

○天下有山陰長之象

王輔嗣

○

山勢上通天性高遠不受於逼君子之於小人雖不可

示惡亦不可褻瀆

孔穎達

○矜嚴於外而不增惡於內

所謂吾家毫遜於荒

侯果

○君子之遠小人如天道默

運不下校於物

王逢

○不惡而嚴者外順而內正也尚

惡則小人忌不嚴則正道消

石介

○天下有山山下起

而乃止天上進而相違是遯避之象也君子觀其象以

避遠乎小人遠小人之道若以惡聲厲色適足以致其

怨忿惟在乎矜莊威嚴使知敬畏則自然遠矣

伊川

○

小人內君子外遠小人也初四二五相應不惡也四陽以剛嚴在上臨之不可得而親也

朱震

測曰遯何以遠小人不惡而嚴曰君子言雖遯而正行雖謙而危故疾之則无瑕詆之則无隙故曰市朝有山林焉商賈有巢許焉詩云衣錦尚絀其不惡而嚴之謂乎

初六遯尾厲勿用有攸往象曰遯尾之厲不往何災也

遯而在後尾之象危之道也占者不可以有所往但晦

處靜俟可免災耳

本義

○遯之爲義避內而之外者也

尾之爲物最在體後者也處遯之時不往何災而爲遯

尾禍所及也危至而後行亦不可免乎厲則勿用更有

攸往也

王輔嗣

○陰過二而後遯遯之尾也

子夏傳

○

遯陰長於內而陽在於外故爻在外多吉在內多咎初以陰在內而應外陽是遯世之小人志存君子之道也四在外卦之始爲遯首初最處內欲往從之爲遯之尾往將爲厲止則不害

陸德明

○他卦以下爲初遯者往

遯也在前者先進故初乃爲尾尾在後之物也遯而在後不及者也是以危也初以柔處微既已後矣不可往也往則危矣微者易於晦藏往既有危不若不往之无灾也古人處微下隱亂世而不去者多矣

伊川

○勿用

有攸往者言雖止不去但當危行言遜不可更有所作

用耳

張汝明

六二執之用黃牛之革莫之勝說

吐活反

象曰執用黃牛

固志也

以中順自守人莫能解必遜之志也占者固守亦當如

是

本義

○居內處中爲遜之主物皆遜已何以固之若

能執乎理中厚順之道以固留之則莫之勝解

王輔嗣

○上應貴主志在輔時獨守中直堅如革束執此之志

莫之勝說殷之父師當此爻矣

侯果

○小人之道狹而

鮮親至於履位人多去之故繫之以利質之以愛然後

人不得去堅其志而不拔乃得小人之中而獲順也

實

○三爲賢人二能執而留之遯世小人見君子將去

願執而固之是用其中順之道以變革遯之時者也黃

中也牛順也革變也固執也

陸希聲

○二與五應方陽

之遯執而止之非出款誠至意陽不願也

東坡

○二與

五爲正應雖在相違遯之時二以中正順應於五五以

中正親合於二其交自固黃中色牛順物革堅固之物

二五以中正順道相與其固如執係之以牛革也莫之

勝說謂其交之固不可勝言也在遯之時故極言之

伊

川

○六二居大臣之位任國家之責不當遯者也故六

二不言遯

吳綺

○五在上得中二以中順固結之有黃

牛之革之象莫之勝說言二之從五者固也

胡炳文

九三係遯有疾厲畜臣妾吉象曰係遯之厲有疾憊也畜臣妾吉不可大事也

下比二陰當遯而有所係之象有疾而危之道也然以畜臣妾則吉蓋君子之於小人惟臣妾則不必其賢而可畜耳故其占如此

本義

○在內近二以陽附陰宜遯

而係故曰係遯遯之爲義宜遠小人以陽附陰係於所任不能遠害亦以憊矣宜其屈辱而危厲也係於所任畜臣妾可也施之大事凶之道也

王輔嗣

○得位於內

而不能去係於遯者雖不能退而得政於小人使臣妾

不能擅政則吉

陸德明

○下附二陰而不任以權如剥

以宮人寵之類

石介

○六二係九三而三有憂疾以臣

妾畜之不使之進

勾微

○陽志說陰三與二切比係乎

二者也遯貴速而遠有所係累則安能速且遠也害於

遯矣故爲有疾也遯而不速是以危也臣妾小人女子

懷恩而不知義親愛之則忠其上係戀之私恩懷小人

女子之道也故以畜養臣妾則得其心爲吉也然君子

之待小人亦不如是也三與二非正應以睽比相親非

待君子之道若以正則雖係不得爲有疾蜀先主之不

忍棄士民是也雖危爲无咎矣

伊川

○係戀也比乎二

陰宜遯而係故曰係遯遯之爲義宜遠小人以陽附陰有所係戀不能遠害故有疾柔將剥剛故有危臣妾謂二陰三之係遯以畜臣妾則吉施於大事則不可也

徐

幾

○艮爲闔寺臣妾之象

張清子

○乾三陽所以得遯

而避二陰之長者以有九三以止之也今九三爲二陰所拘係而不得脫將爲陰柔所薄而元氣危矣能如人主之畜臣妾柔而服之使二陰止於內而不往乃吉道也作易者以陰陽消長之會寄之九三憂之治之其所

以爲君子慮者不其周乎

馮奇之

九四好遯君子吉小人否象曰君子好遯小人否也

下應初六而乾體剛健有所好而能絕之以遯之象也

惟自克之君子能之而小人不能故占者君子則吉而

小人否也

本義

○處於外而有應於內君子好遯故能

舍之小人繫戀是以否也

王輔嗣

○以陽應陰是與小

人和好者也然失位在外體性剛健是能遯去者也

陸

乘

○九四已在外而遠初故三為繫四為好

王介甫

○

九四為初六之好舍之而遯非君子不可

東坡

○君子

剛斷故能捨之小人繫戀必不能也

侯果

○四與初為

正應是所好愛者也君子雖有所好愛義苟當遯則去

而不疑所謂克已復禮以道制欲是以吉也小人則不能以義處暱於所好牽於所私至於陷辱其身而不能已故在小人則否也否不善也四乾體能剛斷者聖人以其處陰而有繫故設小人之戒恐其失於正也

伊川

○有情好而遯以義制欲而必去之象

馮奇之

九五嘉遯貞吉象曰嘉遯貞吉以正志也

剛陽中正下應六二亦柔順而中正遯之嘉美者也占

者如是而正則吉矣

本義

○遯而得正反制乎內小人

應命率正其志不惡而嚴得正之吉遯之嘉也

王輔嗣

○象云以正志者小人應命不敢爲邪是五能正二之

志故成遯之美也

孔穎達

○九五以剛中正與六二柔

中正相應二固无嫌於五也然其時與位皆不得不遯若泰伯三以天下讓伯夷求仁而得仁凡以正其志而已斯遯之嘉美者也

荀九家

○二以中順之道應已然

亦不可屈已之貞

胡翼之

○小人得志君子避之於外

使小人不得凌然後養其壯大之德以滅小人五處外得權與位正固自在能正羣小之志使不起凶則善矣

陸希聲

○六二其配也舍之而遯猶懼其懷故戒之以

正吉

東坡

○九五中正遯之嘉美者也處得中正之道

時止時行乃所謂嘉美也故爲貞正而吉九五非无係

應然與二皆以中正自處而其心志及乎動止莫非中正而无私繫之失所以爲嘉也在彖則槩言遯時故云與時行小利貞尚有濟遯之意於爻至五遯將極矣故唯以中正處遯言之遯非人君之事故不主君位言然人君之所避遠乃遯也亦在中正而已

伊川

○剛正處

外可行則行不後而往不柔而應不安於疾憊不繫於情好遯之至美也

朱震

○以正志者九五嘉遯隨而不

流无繫也无執也无好也不事於外正其在我之志而

已此見其所以爲嘉也

郭雍

上九肥遯无不利象曰肥遯无不利无所疑也

以剛陽居卦外下无繫應遯之遠而處之裕者也故其

象占如此肥者寬裕自得之意本義○最處外極无應

於內超然絕志心无疑顧憂患不能累矰繳不能及是

以肥遯无不利也王輔嗣○肥饒裕也子夏傳○陽爲

豐富以安閒而居豐富故遯而能肥劉牧○无應於內

高尚其事子雲所謂山雌之肥弋人何慕四皓之類也

石介○太公之亨于周四皓之亨于漢知三將變否脫

然高舉薩未牙而介於道厲未階而潔於身行之藏之

繫我獨照而已孫復○三牽於二陰而爲之止我知其

不可則非獨利我亦以利三東坡○肥者充大寬裕之

意遯者惟飄然遠逝无所繫滯之爲善上九乾體剛斷
在卦之外矣又下无所繫是遯之遠而无累可謂寬綽
有餘裕也遯者窮困之時也善處則爲肥矣其遯如此
何所不利伊川○遯以最深爲美故四之好不如五之
嘉五之嘉不如上之肥王湘卿

測曰初六遯尾蓋危其遯之不早也况可占其所往
乎惟晦處靜俟可免災耳六二正遯之主也然二有
中順之德且與五爲正應是當大臣之任以拯遯爲
責不當遯其身而去者也故有執之用黃牛之革不
可勝說之象若殷之三仁各自靖以獻於文王是其

人也九三陽剛之賢方遯而有所繫則不能遯矣故
曰有疾厲于斯時也何以處之故又曰畜臣妾吉謂
宜以畜臣妾之道畜小人也包容含蓄不露圭角斯
免之矣若大正之其禍可立而至傳曰不可大事也
昔者陳寔之處張讓狄仁傑之處諸武其由斯道也
乎九四下應初六有所好而能遯非乾剛之君子不
能也若石碣之於衛州吁二疏之於漢太子庶幾近
之九五爻義如堯之禪舜舜之禪禹未至於亢而先
潛又如泰伯之去周民无得而稱焉皆遯之嘉美者
也上九肥遯无不利傳何以曰无所疑也其中心蚤

有所見者乎誰其繫而好之者哉子夏曰肥饒裕也

三三

乾下
震上

大壯

序卦遯者退也物不可以終遯故受之以大壯遯爲違
去之義壯爲進盛之義遯者陰長而陽遯也大壯陽之
壯盛也衰則必盛消息相須故既遯則必壯大壯所以
次遯也爲卦震上乾下乾剛而震動以剛而動大壯之
義也剛陽大也陽長已過中矣大者壯盛也又雷之威
震而在天上亦大壯之義

程傳

大壯利貞

大謂陽也四陽盛長故爲大壯二月之卦也陽壯則占

者吉亨不假言但利在正固而已

本義

○大謂陽爻小

道將滅大者獲正故利貞也

王輔嗣

○壯者強盛之名

以陽稱大陽長既多大者盛壯故曰大壯利貞者卦德

也羣陽盛長大者獲正故曰利貞

孔穎達

○用壯非君

子之常雖得時得位不違謙則乃吉九四九二以陽居

陰則獲吉九三以陽居陽太剛而觸藩况六五上六以

弱據強哉

陳臯

○君子之道不壯則不可以勝小人壯

不可過也四陽足以勝二陰可止而不可征故曰利貞

襍卦曰大壯則止是也

王介甫

○大壯之道利於貞正

也大壯而不得其正強猛之爲耳非君子之道壯盛也

伊川

○遯小利貞小者利於正也指二陰言大壯利貞大者利於貞也指四陽言陰之進不正則小人得以陵君子陽之進不正則君子不能勝小人皆扶陽抑陰之意也

丘行可

○復臨泰陽長於內皆亨大壯陽自內而達於外亨不待言利貞自一陽至於四陽而動而進正也亦不可以剛動而進遂失其正也觀四陰不取小者之壯而以二陽在上爲觀大壯則以四陽爲大者之壯而猶恐大者或失其正小者得以乘之也戒以利貞其拳拳於君子之意可知矣

胡炳文

測曰襍卦曰大壯則止遯則退也遯二陰而消陽聖

人不欲其進故曰繫遯有疾厲好遯君子言蓋欲使
之退也大壯四陽進而消陰聖人慮後陽之恃壯以
取敗故戒之曰羝羊觸藩羸其角蓋止其妄進也序
卦遯之後受之以大壯此正否極泰生之義消息相
須既遯則必壯理之常也以殷周之間攷之大壯正
當文王三分天下有其二之時至夬則當武王之時
矣大壯大者壯也此以勢言利貞大者正也此以理
言大壯而不利貞則勢有餘而理不足恃壯妄爲豈
其利哉惟當大壯之時而必利貞焉則其大者正矣
此聖人所以對越天命也由是而夬之中行可馴至

矣詩曰王功伊濯惟豐之垣四方攸同王后維翰凡以頌文王之大壯也又曰永言配命自求多福即卦辭之所謂利貞也

彖曰大壯大者壯也剛以動故壯

釋卦名義以卦體言則陽長過中大者壯也以卦德言則乾剛震動所以壯也

本義

○所以名大壯者謂大者壯

也陰爲小陽爲大陽長以盛是大者壯也下剛而上動以乾之至剛而動故爲大壯爲大者壯與壯之大也

伊

川

大壯利貞大者正也正大而天地之情可見矣

釋利貞之義而極言之

本義

○天地之情正大而已矣

弘正極大則天地之情可見矣

王輔嗣

○天地无不覆

載大也覆載无所偏私正也

劉牧

○以大爲正天地之

至情

東坡

○大者既壯則利於貞真正而大者道也極

正大之理則天地之情可見矣天地之道常久而不已

至大至正也正大之理學者默識心通可也不云大正

而云正大恐疑爲一事也

伊川

○大者壯以氣言也大

者正以理言也

齊夢龍

象曰雷在天上大壯君子以非禮弗履

自勝者強

本義

○雷在天上剛以動也壯而違禮則凶

凶則失壯也故君子以大壯而順理也王輔嗣○雷助

天威故曰大壯

崔憬

○壯不由禮失柔克之道湯稟純

剛至正之德動與天齊猶率履不越用此象也薛簪○

克已復禮壯孰甚焉

橫渠

○雷震於天上大而壯也君

子觀大壯之象以行其壯君子之大壯者莫若克已復

禮古人云自勝之爲強中庸於和而不流中立而不倚

皆曰強哉矯赴湯火蹈白刃武夫之勇可能也至於克

已復禮則非君子之大壯不可能也故曰君子以非禮

勿履

伊川

測曰大壯以非禮勿履者何曰壯也者強也君子必

自強其德而後可以強天下之勢也孔子以克己復禮告顏淵而曰非禮勿視聽言動此自強其德也及答其爲邦之問又必曰放鄭聲遠佞人要之歸於正者乃所以保天下之壯也由是觀之則大壯利貞之義思過半矣

初九壯于趾征凶有孚象曰壯於趾其孚窮也

趾在下而進動之物也剛陽處下而當壯時壯于進者也故有此象居下而壯于進其凶必矣故其占又如此象云其孚窮也言必窮困

本義

○夫得大壯者必能自

終成也未有陵犯於物而得終其壯者在下而壯故曰

壯于趾也居下而用剛壯以斯而進窮凶可必也故曰

征凶有孚

王輔嗣

○體性剛健志在於進而上无其應

其征必凶

陸德明

○初陽剛乾體而處下壯於進者也

在下而用壯壯于趾也趾在下而進動之物九在下用壯而不得其中夫以剛處壯居上无不可行况在下乎故征則其凶有孚孚信也謂以壯往則得凶可必也

伊

川○人行趾先動古人之始事必躊躇進退遜以出之

期於成事今壯於趾是始事而用壯進銳如此何爲不

凶

馮時行

九二貞吉象曰九二貞吉以中也

以陽居陰已不得其正矣然所處得中則猶可因以不失其正故戒占者使因中以求正然後可以得吉也

義

○居得中位以陽居陰履謙不亢是以貞吉

王輔嗣

○以陽履陰健而得中有應在上得正之吉

陸德明

○

凡卦爻陰陽失位未有不凶獨大壯之時不可怙其剛盛故以陽居陰則皆獲吉

胡旦

○二雖以陽剛當大壯

之時然居柔而處中是剛柔得中不過於壯得貞正而吉也或曰貞非以九居二爲戒乎曰易取所勝爲義以陽剛健體當大壯之時處得中道无不正也在四則有不正之戒人能識時義之輕重則可以學易矣

伊川

○

卦辭言利貞指九二也然九二以剛而居下體之中未能究天德之用故但曰貞吉而已若九二者蓋非禮弗履之士也

郭雍

九三小人用壯君子用罔貞厲羝羊觸藩羸其角象曰小人用壯君子罔也

過剛不中當壯之時是小人用壯而君子則用罔也罔无也視有如无君子之過於勇者也如此則雖正亦危矣羝羊剛壯喜觸之物藩籬也羸困也貞厲之占其象如此故傳言小人以壯敗君子以罔困也

本義

○處健

之極以陽處陽用其壯者也故小人用之以爲壯君子

用之以爲羅已者也貞厲以壯雖復羝羊以之觸藩能

无羸乎

王輔嗣

○九三處乾之上是健之極也又以陽

居陽是健而不謙也健而不謙必用其壯小人當此不知恐懼即用以爲壯盛故曰小人用壯君子當此即慮危難用之以爲羅罔於已故曰君子用罔以壯爲正其正必危狀似羝羊觸藩也必拘羸其角矣羸拘纒纏也

孔穎達

○罔當讀爲剛以正制斷而處重剛是貞厲

也

陸績

○罔不也君子尚德而不用壯存謙而免咎若

用其壯則雖正亦危矣

劉牧

○壯惟小人用之君子則

否罔不用也

石介

○以狠壯犯九四之陽求上六之陰

九四藩也

王介甫

○陽壯則輕敵陰窮則謀深藩上六

也

東坡

○九三以剛居陽而處壯又當乾體之終壯之

極者也極壯如此在小人則爲用壯在君子則爲用罔
小人尚力故用其壯勇君子志剛故用罔罔无也猶云
蔑也以其至剛蔑視於事而无所忌憚也君子小人以
地言如君子有勇而无義爲亂剛柔得中則不折不屈
施於天下而无不宜苟剛之太過則无和順之德多傷
莫與貞固守此則危道也凡物莫不用其壯齒者齧角
者觸蹄者踉羊壯於首羝爲喜觸故取爲象羊喜觸藩
籬以藩籬當其前也蓋所當必觸喜用壯如此必羸困

其角矣猶人尚剛壯所當必用必至摧困也三壯甚如此而不至凶何也曰如三之爲其往足以至凶而方言危故未及於凶也凡可以致凶而未至者則曰厲也

伊

川○用壯无禮之勇也用罔不慮之決也處位不中而好進前犯乎剛故守乎此以爲正則危矣大壯三四五爻有兌象兼二爻看亦有兌象兌爲羊羝羊喜用其角而觸者藩四也進則爲四所困故以羝羊羸角爲象云

蔡
淵

九四貞吉悔亡藩决不羸壯於大輿之輓象曰藩决不羸尚往也

貞吉悔亡與咸九四同占藩决不羸承上文而言也決
開也三前有四猶有藩焉四前二陰則藩決矣壯于大
輿之輹亦可進之象也以陽居陰不極其剛故其象占
如此

本義

○下剛而進將有憂虞而以陽處陰行不違

謙不失其壯故得貞吉而悔亡也已得其壯而上陰不
罔已路故藩决不羸壯于大輿之輹无有能脫其輹者
可以往也

王輔嗣

○三與上應而四隔之三以剛用壯

自羸其角四以謙自處不能制之故決而不羸則三得
以進故曰上往四无應于下而上承五猶輹輔輿故往
有濟

陸震

○體壯失中悔也然以陽居陰而能謙下故

悔亡羣陽共進而務載於已是大輿之輶壯又陰爻不
妨已路故尚往也

劉牧

○四陽剛長盛壯已過中壯之

甚也然居四爲不正方君子道長之時豈可有不正也
故戒以貞則吉而悔亡蓋方道長之時小失則害亨進
之勢是有悔也若在他卦重剛而居柔未必不爲善也
大過是也藩所以限隔也藩籬決開不復羸困其壯也
高大之車輪輶強壯其行之利可知故云壯于大輿之
輶謂壯于進也

伊川

○四以上則震爲大塗羣羊並驅

而前无羸困之患輿之行正在輶輶壯則大輿由大塗

而往四陽上進將爲決之決乾之純矣

張清子

六五喪羊于易无悔象曰喪羊于易位不當也

卦體似兌有羊象焉外柔而內剛者也獨六五以柔居中不能抵觸雖失其壯然亦无所悔矣故其象如此而占亦與咸九五同易容易之易言忽然不覺其亡也或作疆場之場亦通漢食貨志場作易

本義

○羊壯也居

大壯之時以陽處陽猶不免咎而況以陰處陽以柔乘剛者乎違謙越禮必喪其壯羣陽方進勢不可止若于平易之時逆舍其壯委身任二不爲違拒亦剛所不害不害亦无悔矣故曰喪羊于易无咎也

孔穎達

○陽爲

大而能壯故壯而得中所以貞吉五以柔居之是失其

爲壯之義于易者言五居中而行之匪難也夫大壯者
用壯以濟時今五居盛位反體陰柔失其爲壯中以自
守不能弘濟但无悔而已

劉牧

○剛柔者所以立本變

通者所以趨時方其趨時則位正當而有咎凶位不當
而无悔者有矣大壯之時得尊位大中而處之以柔能
喪其狠者也子絕四類是矣

王介甫

○羊羣行而喜觸

以象諸陽並進四陽方長而並進五以柔居上若以力
制則難勝而有悔唯和易以待之則羣陽无所用其剛
是喪其壯于和易也如此則可以无悔五以位言則正
以德言則中故能用和易之道使羣陽雖壯无所用也

象言所以必用柔和者以陰柔居尊位故也若以陽剛
中正得尊位則下无壯矣以六五位不當也故設喪牛
于易之義然大率治壯不可用剛夫君臣上下之勢不
相侔也苟君之權足以制乎下則雖有強壯跋扈之臣
不足謂之壯也必人君之勢有所不足然後謂之治壯
故治壯之道不可以剛也

伊川

上六羝羊觸藩不能退不能遂无攸利艱則吉象曰不能
退不能遂不詳也艱則吉咎不長也

壯終動極故觸藩而不能退然其質本柔故又不能遂
其進也其象如此其占可知然猶幸其不剛故能艱以

處則尚可以得吉也

本義

○有應於三故不能退懼於

剛長故不能遂持疑猶豫志无所定以斯決事未見所
利雖處剛長剛不害正苟定其分固志在一以斯自處
則憂患消亡故曰艱則吉也

王輔嗣

○四爲剛動之首

而已應在三不度德量力而用壯狠觸四以求三狠壯
則不能自反是不能退雖進而求三四爲之藩不能遂
也

王介甫

○陰柔不能居壯以其居壯之上斯爲壯之

過不詳者不能審詳其義遂至過壯

劉牧

○羝羊但取

其用壯故陰爻亦稱之六以陰處震終而當壯極其過
可知如羝羊之觸藩雖進則礙身退則妨角進退皆不

可也才本陰柔故不能勝已以就義是不能退也陰柔
之人雖極用壯之心然必不能終其壯有摧必縮是不
能遂也其所爲如此无所往而利也陰柔處壯不能固
其守若遇艱困必失其壯失其壯則反得柔弱之分矣
是艱則得吉也用壯則不利知艱而處柔則吉也居壯
之中有變之義也

伊川

○五上皆陰五已喪羊上又取

羝羊觸藩者五喪羊專以一爻言也上羝羊合一卦而
言也蓋至於上則壯終動極故與下卦之終同象上之
壯已極不能退六之質本柔不能遂然三羸角上艱則
吉者三過剛必至於自困上不剛故可勉之以艱也兼

壯終有變之義

胡炳文

測曰大壯之時尤宜慎動故文王以利貞彖卦而周公繫爻則兼中正與時位言之初九雖剛陽之才然處下位而當壯初不當進者也而銳于進有壯于趾之象位卑而言高交淺而謀深力小而任大鮮不及矣故其占曰征凶有孚九二當壯時爲任事之臣雖居非其正而處得其中故戒之曰貞則可以得吉虛齋云中指心言正指所行之事言因其宅心忠恕而戒之以求正必无恃壯過爲之事矣故可進而吉也此與卦辭利貞同旨蓋文王嘗以戒其四友之臣故

周公取之以爲辭也九三過剛不中而當壯時壯於進者也在小人則爲用壯无禮之勇也在君子則爲用罔不慮之決也故以貞厲爲占自三至五爲互兌有羊象故又以羝羊觸藩羸其角爲占之象皆戒之之辭也九四爲壯之主以剛決柔乃其任也然居不當位疑若有悔故其占若戒與九二同曰貞則得吉而悔亡此正文王伐密伐崇之事故其象又曰藩决不羸壯于大輿之輹由是而進雖至於夬无難也詩云四方以无拂其斯之謂乎六五以柔居中而當羣陽並進之衝力不能拒而爲其所決故有喪羊干易

之象五互兌有羊象易者寬閒无拒之謂若然則雖失其壯而亦可以无悔矣翼說曰位雖不當道則當也其文王拘幽而散宜生之徒獻厥寶物以求釋罪之義乎上六合一卦言之爲重兌上壯終動極而六之才質本柔故有羝羊觸藩不能退不能遂之象其占无所利可知若能艱以處之則爲善用其壯矣故曰吉蓋許其終可進也於乎聖人處壯之道詳且慎矣

䷢

坤下晉
離上

序對物不可以終壯故受之以晉晉者進也物无壯而

終止之理既盛壯則必進晉所以繼大壯也爲卦離在坤上明出地上也日出於地升而益明故爲晉晉進而光明盛大之義一作意也凡物漸盛爲晉故彖云晉進也晉之明盛故更不言亨順乎大明无用戒正也程傳晉康侯用錫馬蕃庶晝日三接

晉進也康侯安國之侯也錫馬蕃庶晝日三接言多受大賜而顯被親禮也蓋其爲卦上離下坤有日出地上之象順而麗乎大明之德又其變自觀而來爲六四之柔進而上行以至于五占者有是三者則亦當有是寵也本義○晉之爲義晉長之名此卦明臣之昇進故謂

之晉康者美之名也侯謂昇進之臣也臣既柔進天子
美之賜以車馬蕃多而衆庶晝日三接者言非惟蒙賜
蕃多又被親寵頻數一晝之間三度接見也

孔穎達

○

京氏傳曰晉自觀來否極將剝得臣而進於明以卦氣
言之觀八月辟卦晉二月卿卦以大壯爲辟書曰股肱
喜哉元首起哉百工熙哉晉之象也明夷自臨來臨出
則泰因君而夷其明以卦氣言之臨十二月辟卦明夷
九月卿卦以剝爲辟書曰元首叢脞哉股肱惰哉萬事
墮哉明夷之象也

郎顗

○晉與明夷爲反對其當殷之

末世周之盛德也晉象王季之輔相帝乙當西伯之任

而庶邦康寧錫馬蕃庶坤之象也晝日三接離之象也其勤王家以受寵錫故帝乙亦以明德永世明夷象文王之輔相商紂內文明而外柔順以蒙大難也文明離象柔順坤象大難互坎之象艱貞自晦得專征伐故商紂迄於武王南狩而終入于地以喪厥明也荀九家○

襍卦曰晉晝也盛明之世也臣德昇進麗乎大明美德之侯仕于明主明此以進可保寵錫薛仁貴○周官校

人天子十有二閑馬六種邦國六閑馬四種凡朝覲會同毛馬而頒之錫馬蕃庶也大行人公之禮三享三問三勞晝日三接也朱震○晉爲進盛之時大明在上而

下體順附諸侯承王之象也故爲康侯康侯者治安之
侯也上之大明而能同德以順附治安之侯也故受其
寵數賜之馬衆多也車馬重賜也蕃庶衆多也不唯錫
與之厚又見親禮晝日之中至於三接言寵遇之至也
晉進盛之時上明下順君臣相得在上而言則進於明
盛在臣而言則進升高顯受其光寵也 伊川○康侯坤
也坤有土有民有安之象錫馬蕃庶坤爲牝馬爲衆之
象晝日三接離爲日爲中虛之象 胡炳文

測曰晉之卦象爲明出地上是明盛之時也卦德順
而麗乎大明是有致君之德也卦變自觀而來爲六

四之柔進而上行以至於五是其臣之德業足以代君又遇虛中納賢之君能薦之於天也當是時有是德而際遇是君其占爲康國之侯得大君之錫馬衆多而晝日三接也若堯之於舜歷試諸艱而命之攝位舜之於禹使宅百揆而告之以總朕師殷周之於二伯命之得專征伐皆其義也

彖曰晉進也

釋卦名義

本義

○晉進也者以今釋古古之晉字即以

進長爲義恐後世不曉故以進釋之也

孔穎達

○彖曰

晉進也棟卦曰晉晝也蓋進之義不特以進爲進而必

以明爲進也

立行可

明出地上順而麗乎大明柔進而上行是以康侯用錫馬蕃庶晝日三接也

以卦象卦德卦變釋卦辭

本義

○坤能順從而麗著于

大明凡言上行者所以在貴也康美之名也順以著明臣之道也柔進而上行物所與也故得錫馬而蕃庶以訟受服則終朝三褫柔進受寵則一晝三接也

王輔嗣

○晉進也益進而盛也明出於地益進而盛故爲晉所以不謂之進者進爲前進不能包明盛之義明出地上離在坤上也坤麗於離以順麗於大明順德之臣上附

於大明之君也凡卦離在上者多云柔進而上行噬嗑
睽曷是也六五以柔居君位明而順麗爲能待下寵遇
親密之義是以爲康侯用錫馬蕃庠晝日三接也大明
之君安天下者也諸侯能順附天子之明德是康民安
國之侯也故謂之康侯是以享寵錫而見親禮晝日之
間三接見於天子也不曰公卿而曰侯天子治於上者
也諸侯治於下者也在下而順附於大明之君諸侯之
象也伊川○四爲諸侯五爲天子六四進而之五以諸
侯近天子之光出明而受福朱震○坤順之臣進而附
麗於離明之君此釋康侯錫馬之義柔臣德也五君位

也四近君卦自觀變六四之柔近君進而上行至五九五之剛下降居四而成離日猶朝貢之臣爲天子所禮接此釋晝日之義

吳切清

象曰明出地上晉君子以自昭明德

昭明之也

本義

○以順著明自顯之道

王輔嗣

○明出

地上大明之道可進之時君子著明德求上知之時也

子夏傳

○上无文明賢斯遜矣文明麗乎上君子可不

進乎柔順內融上不拒其逼故晝日三接英華外著人

不疑其行故君子以自昭明德

范育

○傳曰昭德塞遠

昭其度也君子觀明出地上而益明盛之象而以自昭

其明德去蔽致知昭明德於已也明明德於天下昭明
德於外也明明德在已故曰自昭伊川○至健莫如天
故君子以之自強至明莫如日故君子以之自昭胡炳
文

測曰法象之義云何薛河東曰地暗火明明出於暗
爲晉君子觀其象以去暗即明爲自昭明德愚曰此
即克明俊德也而作新民之道具是矣故以爲晉之
法象也

初六晉如摧如貞吉罔孚裕无咎象曰晉如摧如獨行正
也裕无咎未受命也

以陰居下應不中正有欲進見摧之象占者如是而能
守正則吉設不爲人所信亦當處以寬裕則无咎也象
云初居下位未有官守之命也

本義

○處順之初應明

之始明順之德於斯將隆進明退順不失其正故曰晉
如摧如貞吉也處卦之始功業未著物未之信故罔孚
方踐卦始未至履位以此爲足自喪其長者也故必裕
之然後无咎

王輔嗣

○摧憂愁也應在四故晉如履失

其位故摧如動靜得時故貞吉

虞仲翔

○未爲上信未

受上命修德自退寬以居之故无咎

子夏傳

○獨行正

者獨猶專也言進與退專行其正也

孔穎達

○初六以

乘進君子也度義以進退者也常人不見孚則或急於
進以求有爲或急於退以對上之不知孔子曰我待價
者也此罔孚而裕於進也孟子又於齊此罔孚而裕於
退也

王介甫

○初居晉之下進之始也晉如升進也摧

如抑退也於始進而言遂其進不遂其進唯得正則吉
也罔孚者在下而始進豈遽能深見信於上苟上未見
信則當安中自守雍容寬裕无急於求上之信也苟欲
信之心切非汲汲以失其守則悻悻以傷於義矣皆有
咎也故裕则无咎君子處進退之道也

伊川

○欲進而

退六象上互艮有欲進而止之象凡始進必資薦引四

應不中正乃若相摧抑者進之初人多有未信者然摧如在彼而吾不可以不正罔乎在人而吾不可以不裕初以陰居陽非正才柔志剛不足於裕貞與裕皆戒辭也

胡炳文

六二晉如愁如貞吉受茲介福于其王母象曰受茲介福以中正也

六二中正上无應援故欲進而愁占者如是而能守正則吉而受福於王母也王母指六五蓋亨先妣之吉占而凡以陰居尊者皆其類也

本義

○進而无應其德不

昭故曰晉如愁如居中得位履順而正不以无應而回

其志處晦能致其誠者也修德以斯闇乎幽昧得正之吉也故曰貞吉母者處內而成德者也鳴鶴在陰則其子和之立誠於闇闇亦應之故其初愁如履貞不回則乃受茲大福于其王母也

王輔嗣

○周公以明順之德

履得其位而上事幼冲之主致有四國流言之謗居東三年斯晉如愁如之象也後成王感風雷之變啓金縢之書乃悟而迎周公是受福于其王母之驗也

荀九家

○修德於幽而无應於明故愁如在憂无應而不爲邪

鬼神之幽且福之矣王母至幽之象

王介甫

○母居家

內而成德之稱二居坤卦之內有中正厚順之德又坤

爲母故取象焉夫爲母居內受福之大莫若王母六二處內德盛受福亦殊不可以常母當之故云王母

代淵

○六二在下上无應援以中正柔和之德非強於進者也故於進爲可憂愁謂其進之難也然守其真正則當得吉故云晉如愁如貞吉王母祖母也謂陰之至尊者指六五也二以中正之道自守雖上无應援不能自進然其中正之德久而必彰上之人自當求之蓋六五大明之君與之同德必當求之加之寵祿受介福於王母也介大也

伊川

○五下互坎爲加憂二欲進而前有坎險

又爲艮山所阻故有憂愁之象以能守正故得終吉

胡

桂一

六三衆允悔亡象曰衆允之志上行也

三不中正宜有悔者以其與下二陰皆欲上進是以爲

衆所信而悔亡也

本義

○處非其位悔也志在上行與

衆同信順而麗明故得悔亡也

王輔嗣

○當周室之衰

微天下追思文武之德齊桓晉文能糾諸侯以尊周爲

事斯衆允悔亡之義也

荀九家

○坤爲衆三失正與上

易位則悔亡故曰上行也

虞仲翔

○以六居三不得中

正宜有悔咎而三在順體之上順之極者也三陰皆順

上者也是三之順上與衆同志衆所允從其悔所以亡

也有順上向明之志而衆允從之何所不利古人曰謀
從衆則合天心象云上行者上順麗於大明也上從大
明之君衆志之所同也伊川○衆坤象坤順之極故有
允象三居下卦之上爲衆陰之長正康侯之謂也初罔
孚衆未允也二愁如猶有悔也三居順之極而衆皆相
信可以進而受三接之寵矣未信而進其悔在後衆允
而進其悔乃亡胡炳文

九四晉如鼫鼠貞厲象曰鼫鼠貞厲位不當也

不中不正以竊高位貪而畏人蓋危道也故爲鼫鼠之

象占者如是雖正亦危本義

○履非其位上承於五下

據三陰履非其位又負且乘无業可安志无所據以斯爲進正之危也進如鼫鼠无所守也

王輔嗣

○蔡邕云

鼫鼠五能不成一技謂其能飛不能過屋能緣不能窮木能游不能渡谷能穴不能掩身能走不能先人九四失位上承於五上不許其承下據三陰下亦不許其據事同鼫鼠无所成功也故曰貞厲

孔穎達

○鼫鼠晝伏

夜行貪猥无已雖進承五而潛據下陰又居不正之地故危也

翟子元

○四爲明進之首下之所仰而以陽據

陰不能以光明下濟履非其位上承於五固其寵祿素食竊位爲正之危者也鼫鼠之志竊食黍稷而已

陸震

○有志而未必能者鼯鼠也六二六三非所當得因其
遇我欲兼有之而衆不聽故曰晉如鼯鼠九四之有初
六正也非其正者固不可得而正者獨危位不當故也

東坡

○以九居四非其位也非其位而居之貪據其位

者也貪處高位既非所安而又與上同德順麗於上三
陰皆在已下勢必上進故其心畏忌之貪而畏人者鼯
鼠也故云晉如鼯鼠貪於非據而存畏忌之心貞固守
此其危可知言貞厲者開有改之道也

伊川

○鼯鼠貪

而畏人九四爻剛位柔之象解以陰居陽者象狐晉以
陽居陰者象鼠九家易坎爲狐解自初至五互重坎上

下三陰故稱三狐。艮爲鼠。晉互體艮。艮上一陽故稱鼯鼠。狐性疑。解當去其疑。鼠性貪。晉當去其貪。取象各有攸當。况晉晝也。鼠亦晝伏。非能以晝晉者。九四不中不正。以竊高位。又畏大明之君。而不敢進。故有此象。其占曰貞厲。雖正亦危。况不中正乎。

胡炳文

六五悔亡。失得勿恤。往吉。无不利。象曰失得勿恤。往有慶也。

以陰居陽。宜有悔矣。以大明在上。而下皆順從。故占者得之。則其悔亡。又一切去其計功謀利之心。則往吉。而无不利也。然亦必有其德。乃應其占耳。

本義

○柔得尊

位陰爲明主能不用察不代下任也故雖不當位能消其悔失得勿恤各有其司慎斯以往无不利也

王輔嗣

○有慶者委任得人非惟自得无憂亦將人所慶說故

曰有慶

孔穎達

○陽爲躁動陰爲靜止三五陽位以陰

居之能節其動故爻辭不稱晉而皆曰悔亡

劉牧

○五

雖失位居得中正如舜耕深山以道自樂及升帝位亦

不爲泰蓋以道自任得之自是失之自是曾不以此介

意小人患得患失恤也

石介

○五居尊位在離明之中

能擴大明之道以任賢故亡悔天下之廣萬機之細其

間未必无一失既能任賢不必恤者

胡翼之

○四奪

其與往而不爭終亦必得

東坡

○六以柔居尊位本當

有悔以大明而下皆順附故其悔得亡也下既同德順附當推誠委任盡衆人之才通天下之志勿復自任其明恤其得失如此而往則吉而无不利也六五大明之主不患其不能明照患其明照之過至於察察失委任之道故戒以失得勿恤也夫私意偏任不察則有蔽盡天下之公豈當復用私察也

伊川

○待衆允而悔亡者

六三是已不待衆允而悔亡者六五是已六五爲自昭

明德之主天下臣民莫不順而麗之何悔不亡苟能得

失不累於心勿勞憂恤持此以往吉无不利也

張清子

○失得主三陰言爲四所間失也終與已合得也丘行
可

上九晉其角維用伐邑厲吉无咎貞吝象曰維用伐邑道
未光也

角剛而居上上九剛進之極有其象矣占者得之而以
伐其私邑則雖危而吉且无咎然以極剛治小邑雖得
其正亦可吝矣本義○處進之極過明之中明將夷焉

已在乎角而猶進之非亢而何失夫道化无爲之事必
須攻伐然後服邑危乃得吉吉乃无咎用斯爲正亦以
賤矣王輔嗣○角者西南隅也其猶曰過於中已在於

角而猶進之故曰進其角在角猶進過亢不已不能端拱无爲使物自服必須攻伐其邑然後服之夫兵者凶器伐而服之是危乃得吉然後无咎象云未光以釋貞吝也

孔穎達

○以柔得治者不能威肅天下終須用師

子夏傳

○五以柔得中而行文明之德上以剛處極而

任強武之力角者剛而上窮以象武事晉而過中至於用武上窮之道不勝內德而務外功不能伐國惟用伐邑而已斯道之未光棄文用武凶危之道危而獲吉方可免咎亦正之鄙者也

陸德明

○晉其角猶曰過中而

映於西北之角也上九有應在三四乃非理據之四處

已下若我邑焉伐之然後三來已戰而服危乃得吉也

句微

○角剛而居上之物上九以剛居卦之極故取角爲象以陽居上剛之極也在晉之上進之極也剛極則有強猛之過進極則有躁急之失以剛而極於進失中之甚也无所用而可維獨用於伐邑則雖厲而吉且无咎也伐四方者治外也伐其居邑者治內也言伐邑謂內自治也人之自治剛極則守道愈固進極則遷善愈速如上九者以之自治則雖傷於厲而吉且无咎也嚴厲非安和之道而於自治則有功也復云貞吝以盡其義極於剛進雖自治有功然非中和之德故於真正之

道爲可吝也不失中正爲貞

伊川

○晉而至於角前无

餘地矣伐其邑自治也春秋之墮三都其策雖窮不猶愈於不墮乎雖危而吉此公至自圍郕所以善之也

李
開

測曰初六當晉之初而應竊位之大臣貪而蔽賢故有摧如之象然進不宜躁與漸卦之義相類故其占能守正則吉苟上或未信則當安中寬裕无急於求上之信则无咎蓋君子出處之道宜爾也六二中正本有其德可進也而上无應援莫有爲之左右於君側故欲進而愁其占貞正受茲介福于其王母者蓋

中正之道久而必彰也但當靜以待之所謂貞也王
母謂柔德之君或幼冲之主如周公以流言之故居
東三年蓋亦愁如之象後成王既悟而迎周公是受
介福之占也六三程傳謂不中正宜有悔者而三在
順體之上與下二陰皆欲上進是以爲衆所信而悔
亡若齊桓晉文糾合諸侯以宗周室是其義也九四
竊非其位而在三陰皆進之上其心貪而畏忌又互
體艮有鼠象故曰晉如鼫鼠貞厲與解六三貞吝同
義言其位雖得於上之所與然德不足以稱之終亦
必失而已矣故曰雖正亦危六五由卦變以陰居尊

位有以臣攝君之象宜有悔矣然而以象與德言之
大明在上則其德足以得民下皆順從則得道者多
助何所爲而不遂哉故其占曰悔亡然當晉之時人
情常患於功利之心勝耳若又能去其一切計功謀
利之心則自无不利矣蓋有不求而自至者古之人
有行之者其惟舜禹與文王乎文王當作豐之後而
四方來同傳至武王竟能進而勅正殷命此往吉无
不利之驗也上九之位也崇富貴已極可謂要于角
矣惟用伐邑以自治其私則雖厲而吉无咎矣然不
知以盈滿自裁至是始自治以保位故曰貞吝而傳

謂之道未光也宜矣

三三

離下坤上明夷

序卦晉者進也進必有所傷故受之以明夷夷者傷也
夫進不已必有所傷理自然也明夷所以次晉也爲卦
坤上離下明入地中也反晉成明夷故義與晉正相反
晉者明盛之卦明君在上羣賢並進之時也明夷昏暗
之卦暗君在上明者見傷之時也日入於地中明傷而
昏暗也故爲明夷

程傳

明夷利艱貞

夷傷也爲卦下離上坤日入地中明而見傷之象故爲

明夷又其上六爲暗之主六五近之故占者利於艱難

以守正而自悔其明也

本義

○日入地中明夷之象施

之於人事闇主在上明臣在下不敢顯其明智亦明夷

之義也時雖至闇不可隨世傾邪故宜艱難堅固守其

貞正之德故明夷之世利在艱貞

孔穎達

○京氏傳曰

明夷自臨來以卦氣言之臨十二月辟卦明夷九月卿

卦大傳曰內文明而外柔順文王以之言文王方當剛

陽浸長之時而有姜里之難云爾

卽巖

○日出地上其

明乃光至其入也明則傷矣故曰明夷猶聖人君子有

明德而遭亂世抑在下位則宜自艱貞无幹事以避小

人鄭康成

○明夷彖曰利艱貞文王自道其姜里事也

荀九家

○君子當明夷之時利在知艱難而不失其貞

正也在昏暗艱難之時而能不失其正所以爲明君子也

伊川

○以二體則離明也傷之者坤以六爻則初至五

皆明也傷之者上上爲暗主而五近之故朱子從彖傳

以利艱貞爲五彖辭多言利貞惟坤利牝馬之貞同人

利君子貞家人利女貞明夷則曰利艱貞在諸爻中惟

噬嗑九四大畜九三言之未有一卦全體以利艱貞爲

義者蓋明夷之時艱難之時也貞一也與處平常之時

異矣彼方欲晦我之明艱難守貞而自昭可也

胡炳文

○利艱貞者謂明傷於坤地之下利居中而不失其正其六二當之乎彖辭文王所作也於坤曰安貞吉於明夷曰利艱貞終守臣節而不失其不可見於此乎

胡一

桂

測曰明夷者晉之反也晉明君在上羣賢並進明夷暗君在上明者見傷斯二者皆天行也非人之所能爲也顧奉天者能不失其正焉爾在他卦但曰利貞在明夷則曰利艱貞蓋當是時雖守正道亦有不得以直遂其正者故利於艱難以守正而自悔其明也即自悔其明亦明夷也與時偕行義當爾也故曰君

子所居而安者易之序也傳何以言文王箕子也曰
羑里之囚傷其明也而大易於是乎演明故在也佯
狂之辱晦其明也而洪範於是乎存明故在也以是
知大道之在天地不可泯也皆所謂利也荀九家以
王季之輔相帝乙專西伯之任爲晉康侯錫馬蕃庶
之象以文王之蒙大難爲明夷利艱貞之象以武王
之伐紂爲南狩得其大首之象皆言殷周間事當存
之以爲易說之証云

彖曰明入地中明夷

以卦象釋卦名

本義

○日出地則明故爲晉入地則晦

故以晦爲夷

徐幾

內文明而外柔順以蒙大難文王以之

以卦德釋卦義蒙大難謂遭紂之難而見囚也

本義

○

文王爲紂所囚內文明而不失已外柔順以免禍是文

王所用合於明夷全卦之義

吳幼清

利艱貞悔其明也內難而能正其志箕子以之

以六五一爻之義釋卦辭內難謂爲紂近親在其國內

如六五之近於上六也

本義

○明入地中明夷者此就

二象以釋卦名故此及晉卦皆彖象同辭也既釋明夷之義又須出能用明夷之人內懷文明之德撫教六州

外執柔順之禮三分事紂以此蒙犯大難身得保全惟
文王能用之故云文王以之利艱貞晦其明也者此又
就二體釋卦之德明在地中是晦其明也既處明夷之
世外晦其明恐陷於邪道故利在艱固其貞不失其正
言所以利艱貞者用晦其明也既釋艱貞之義又須出
能用艱貞之人內有陰難殷祚將傾而能自正其志不
爲邪陷惟箕子能用之故云箕子以之 孔穎達 ○利艱
貞謂六五也居盛位而上承暗主危之甚也處之不亦
艱乎然而不失中正是能正其志也又以陰居陽是能
晦其明也在難中而能正其志斯箕子全其正也 劉牧

○明入地中其明滅也故爲明夷內卦離離者文明之象外卦坤坤者柔順之象爲人內有文明之德而外能柔順也昔者文王如是故曰文王以之明夷之時利於處艱危而不失其真正謂能晦藏其明也不晦其明則被禍患不守其正則非賢明箕子當紂之時切近內難能藏晦其明而自守其正志箕子所用之道也故曰箕子以之

伊川

象曰明入地中明夷君子以蒞衆用晦而明

明所以照君子无所不照然用明之過則傷於察太察則盡事而无含弘之度故君子觀明入地中之象於蒞

衆也不極其明察而用晦然後能容物和衆衆親而安
是用晦乃所以爲明也若自任其明无所不察則已不
勝其忿嫉而无寬厚含容之德人情睽疑而不安失蒞
衆之道適所以爲不明也古之聖人設前旒屏樹者不
欲明之盡乎隱也

程傳

○蒞衆顯明蔽僞百姓者也故

以蒙養正以明夷蒞衆蔽明於內反得明也顯明於外
巧所避也

王輔嗣

○君子性无不明好善而嫉惡苟不

慎密必懼害也默運其明則物不能欺蔽外示以柔則

已不傷苛察如是可以蒞衆也

胡旦

大象蒞衆用晦者何高陵呂氏曰其不教之教不令

之威乎將天下陰受其化矣

初九明夷于飛垂其翼君子于行三日不食有攸往主人有言象曰君子于行義不食也

飛而垂翼見傷之象占者行而不食所如不合時義當

然不得而避也

本義

○明夷之主在於上六上六爲至

闇者也初處卦之始最遠於難也遠難過甚明夷遠遜絕跡匿形不由軌路故曰明夷于飛懷懼而行行不敢顯故曰垂其翼也尚義而行故曰君子于行也志急於行飢不遑食故曰三日不食也殊類過甚以斯適人人疑之故曰有攸往主人有言

王輔嗣

○火性炎上離

爲飛鳥故曰于飛爲坤所抑故垂其翼陽爲君子三者
陽德成也日以喻君不食者不得食君祿也荀爽○飛

者以下爲順垂其翼飛而下者也明夷難在上是以宜
下不宜上二老避紂不食之象伊尹就桀有攸往之象

王介甫

○明夷者自夷以全其明也物飛而舉其翼則

必見牽矣方未去垂其翼緩之至也及其去三日不遑
食急之至也是何也懼不免也去主而適敵主人必以

我爲謀已主人上六也

東坡

○初九明體而居明夷之

初見傷之始也九陽明上升者也故取飛象昏暗在上
傷陽之明使不得上進是于飛而傷其翼也翼見傷故

垂朶凡小人之害君子害其所以行者君子于行三日
不食君子明照見事之微始雖有見傷之端未顯也君
子則能見之矣故行去避之君子于行謂去其祿位而
退藏也三日不食言困窮之極也事未顯而處其艱非
見幾之明不能也夫知幾者君子之獨見非衆人之所能
識也故明夷之始其見傷未顯而去之則世俗孰不疑
怪故有所往適則主人有言也然君子不以世俗之見
怪而遲疑其行也若俟衆人盡識則傷已及而不能去
矣此薛方所以爲明而楊雄所以不獲其去也如穆生
之去楚申公白公且非之况世俗之人乎但譏其責小禮

而不知穆生之去避胥靡之禍也又如袁閔於黨事未起之前名德之士方鋒起而獨潛身土室故人以為狂生卒免黨錮之禍所往而人有言胡足怪也

伊川

六二明夷夷于左股用拯馬壯吉象曰六二之吉順以則也

傷而未切救之速則免矣故其象占如此

本義

○夷于

左股者左股被傷行不能壯六二以柔居中用夷其明不行剛壯之事者也莊氏云言左者取其傷小則比夷右未為切也夷于左股明避難不壯不為闇主所疑猶得處位不至懷懼而行然後徐徐用馬以自拯濟而獲

其壯吉也

孔頴達

○二以柔居位是居位之人既當

世不能如初高飛絕跡故傷於左股尚有右股未盡傷

滅猶遠於難若能於此自求拯救須假壯馬而行取其

疾也乃獲吉順以則者若能柔順事上見不可而自引

去亦是君臣之法

石介

○夷于左股文王囚于羑里之

象用拯馬壯閔天散宜生之徒是也

荀九家

○股輔下

體者也三下體也二輔馬三未離下體乘馬之象二拯

馬者也三賴其拯之得其所附是以吉也此若太顛閔

天之徒輔周之興也

王介甫

○六二以至明之才得中

正而體順順時自處處之至善也雖君子自處之善然

當陰闇小人傷明之時亦不免爲其所傷但君子自處有道故不能深相傷害終能違避之爾足者所以行也股在脛足之上於行之用爲不甚切左又非使用者手足之用以右爲便唯蹶張用左蓋右立爲本也夷于左股謂傷害其行而不甚切也雖然亦必自免有道拯用壯健之馬則獲免之速而吉也君子爲陰闇所傷其自處有道故其傷不甚自拯有道故獲免之疾用拯之道不壯則被傷深矣故云馬壯則吉也二以明居陰闇之下所謂吉者得免傷害而已非謂可以有爲於斯時也

伊川

○用拯馬壯吉渙初六亦言之大抵救傷拯渙非

健速不可故皆以馬壯言

鄭剛中

九三明夷于南狩得其大首不可疾貞象曰南狩之志乃大得也

以剛居剛又在明體之上而屈於至暗之下正與上六闇主爲應故有向明除害得其首惡之象然不可以亟也故有不可疾貞之戒成湯起於夏臺文王興於羑里正合此爻之義而小事亦有然者

本義

○處下體之上

居文明之極上爲至晦入地之物故夷其明以獲南狩得大首也南狩者發其明也既誅其主將正其民民之迷也其日固已久矣化宜以漸不可速正故曰不可疾

貞王輔嗣

○南方文明之所狩者征伐之類九三應於

上六是明夷之臣發明以征闇君而得其大首故曰明

夷于南狩得大首也

正義

○九三居三公之位極明至

剛得位而應故成南狩之功

朱震

○九三離之上明之

極也又處剛而進上六坤之上暗之極也至明居下而

爲下之上至暗在上而處窮極之地正相敵應將以明

去暗者也斯義也其湯武之事乎南在前而明方也狩

畋而去害之事也南狩謂前進而除害也當克獲其大

首大首謂暗之魁首上六也三與上正相應爲至明克

至暗之象不可疾貞謂誅其元惡舊染汙俗未能遽革

必有其漸革之遽則駭懼而不安故酒誥云惟殷之迪
諸臣惟工乃洎於酒勿庸殺之姑惟教之至於既乂尚
曰餘風未殄是漸漬之俗不可以遽革也故曰不可疾
貞正之不可急也上六雖非君位以其居上而暗之極
故爲暗之主謂之大首

伊川

六四入于左腹獲明夷之心于出門庭象曰入于左腹獲
心意也

此爻之義未詳竊疑左腹者幽隱之處獲明夷之心于
出門庭者得意於遠去之義言筮而得此者其自處當
如是也蓋離體爲至明之德坤體爲至闇之地下三爻

明在闇外故隨其遠近高下而處之不同六四以柔正
居暗地而尚淺故猶可以得意於遠去五以柔中居闇
地而已迫故爲內難正志以晦其明之象上則極乎闇
矣故爲自傷其明以至於闇而又足以傷人之明蓋下五
爻皆爲君子獨上一爻爲闇君也

本義

○左者取其順

也入于左腹得其心意故雖近不危隨時避難門庭而
已能不逆忤也

王輔嗣

○四以陰實與闇主同體得明

夷之心者也然履正多懼與三相比是居闇主之朝輔
南狩之運者也入以權道深自獻納能獲闇奧之志在
南狩出門庭之際兩相際會門庭由正道也以權納于

腹以正會于門反經合義伊尹五就桀五就湯之事也

陸希聲

○四本上體順而首來比三義不誅降故无凶

咎入于左腹深究南狩之情獲明夷之心謂得三之心

意所存也于出門庭謂所敵未遠而已獲心意明先見

也四體陰而下麗于明故有先見之象

劉牧

○獲明夷

之心者謂獲九三南狩之心也如武王觀兵諸侯來會

于出門庭言相從之速也

石介

○順得暗主之意不被

疑害不勞遠遜而免於難

代淵

○六四以陰居陰而在

陰柔之體處近君之位是陰邪小人居高位以柔邪順

於君也六五明夷之君位傷明之主也四以柔邪順從之

以固其交夫小人之事君未有由顯明以道合者也必
以隱僻之道自結於上右當用故爲明顯之所左不當
用故爲隱僻之所人之手足皆以右爲用世謂僻所爲
僻左是左者隱僻之所也四由隱僻之道深入其君故
云入于左腹入腹謂其交深也其交之深故得其心凡
姦邪之見信於其君皆由奪其心也不奪其心能无悟
乎于出門庭既信之於心而後行之於外也邪臣之事
暗君必先蠱其心而能行於外

伊川

○坤有腹象入于

左腹自離而入于坤也坤偶有門象于出門庭猶可去
而出於坤也獲明夷之心者微于之自靜出門庭者微

子之行遯也

胡炳文

六五箕子之明夷利貞象曰箕子之貞明不可息也

居至闇之地近至闇之君而能正其志箕子之象也貞

之至也利貞以戒占者

本義

○最近於晦與難爲比陰

莫如茲而在斯中猶闇不能沒明不可息正不憂危故

利貞也

王輔嗣

○六五最比闇君似箕子之近殷紂故

曰箕子之明夷也利貞者箕子執志不回明不可息故

能保其貞卒以全身爲武王師也

孔穎達

○紂爲上六

箕子不當處六五之位以陰道處尊位行柔順而御天

下上奉至闇內秉文明非文王莫可當已故大傳稱外

柔順以蒙大難文王以之周公不欲指文王而直稱箕

子蓋爲父諱也

孫坦

○箕子紂之諸父德可以王故以

當五被髮佯狂以明爲暗卒以全身爲武王師故曰利
貞比干諫而死所以存義貞而不利微子去之所以達
權利而不貞

王介甫

○五爲君位乃常也然易之取義

變通隨時上六處坤之上而明夷之極陰暗傷明之極
者也五切近之聖人因以五爲切近至暗之人以見處
之之義故不專以君位言上六陰暗傷明之極故以爲
明夷之主五切近傷明之主若顯其明則見傷害必矣
故當如箕子之自晦藏則可以免於難箕子商之舊臣

而同姓之親可謂切近於紂矣若不自晦其明被禍可
必也故佯狂爲奴以免於害雖晦藏其明而內守其正
所謂內難而能正其志所以謂之仁與明也若箕子可
謂貞矣以五陰柔故爲之戒云利貞謂宜如箕子之貞
固也若以君道言義亦如是人君有當含晦之時亦外
晦其明而內正其志也

伊川

上六不明晦初登于天後入於地象曰初登於天照四國
也後入于地失則也

以陰居坤之極不明其德以至於晦始則處高位以傷
人之明終必至於自傷而墜厥命故其象如此而占亦

在其中矣照四國以位言

本義

○處明夷之極是至晦

者也本其初也在乎光照轉至於晦遂入於地

王輔嗣

○暗而過中明夷之極晦之至也位高勢崇登于天也

失道之則後入於地

子夏傳

○易以意爲主此卦之意

主在上六故以象暗君則君位不止在五諸卦之意有

類此者唯學者識之

代淵

○前五爻言明夷猶有明可

夷也上居明夷之極无明可夷直不明而晦矣

王湘卿

○上居卦之終爲明夷之主又爲明夷之極上至高之

地明在至高本當遠照明既夷傷故不明而反昏晦也

本居於高明當及遠初登于天也乃夷傷其明而昏暗

後入于地也上明夷之終又坤陰之終明傷之極者也

伊川

○明夷以二體言則離明爲坤暗所傷以六爻言則上一爻爲暗君自五以下皆爲所傷今以商周之事槩論則上一爻極暗爲紂之昏暴五近晦爲箕子之囚奴四與上同體避暗就明爲微子之遜去三與上應以明尅暗爲武王以伐紂二在大臣之位藏明於暗爲文王之姜里初去暗稍遠見傷即避其伯夷太公居海濱之事乎明夷六爻之義於此可見矣

丘行可

測曰初九明夷之始王輔嗣云絕跡不由軌路曰于飛懷懼而行不敢明顯曰垂翼皆見之早也三日不

食義不食也主人有言衆人固不識也其周公以自象其居東之事乎厥後孔子接淅而行亦三日不食之義也其不知者以謂爲腊肉也則亦主人有言之謂歟六二以文明之才得中正而體明順正文王之德也夷于左腹亦謂蒙大難之時處之極善演易姜里不失其文明故以傷而未切爲象而曰夷于左股云爾于時散宜生之徒求諸寶物獻之暗主乃得釋其罪而賜之資斧乃專征伐焉是用拯馬壯也故曰吉人之言曰聖人无死地其文王之謂乎九三明明夷亦以明見傷也于南狩得其大首克其傷我者也亦

爲天下克之也不可疾貞言非出於萬不得已不可爲也故曰在下者有湯武之仁而在上者有桀紂之暴則可傳曰志乃大得亦言其以天下爲志焉耳六四入于左腹說者謂坤爲腹左者隱僻之所四進居坤體之下故曰入于左腹微子於紂爲同姓肺腑之親有其象矣又坤偶有門象故曰獲明夷之心于出門庭此微子之自靖以行遯也六五箕子之明夷傳何以曰明不息也說者曰天人之理一也天之陽未嘗盡消人之善未嘗盡亡故君子保其身以有爲也洪範之陳其夫平其人乎上六惟不明而晦故下五

父之明君子皆爲其所傷也然而君子之明未必傷也卒乃自傷而隕厥命焉於乎若殷紂者可以鑒矣

周易義叢卷之七終